

## KAYAKNU NAI JOHANES YOM

### *JESUS, ONIG LAA NAI, NUG DANAB BEUM*

<sup>1</sup> Kayak Nug keeke oh dig ma heum, haen amu ii nak amu Kristus, Nug onig laa Nai, Nug dayom. Nug Kayak noobpa dayom amge anamib iita, Nug ele Kayak dayom. <sup>2</sup> A oh daapid amu Kayak Nug keeke hekununu dig ma, <sup>3</sup> Nug keeke oh Kristus epegpa me heum. Keeke laa ib laapa ii beum. <sup>4</sup> Jesus Nug am bauklel hanhannu diig. Bauklel amuam danab oh dilag amahlak. <sup>5</sup> Amahlak amu Nug gatatupa amahalte amu gatatu nug amahlak amu edidkununu elele iita.

<sup>6-7</sup> Kayak Nug danab laa nug danab ah amelagpa nai mehuqkununu epedie doum. Danab amu onig Johanes. Nug amahlaknu nai mehuqebeb, danab ah oh ag nuhig mehuqak amupa oolagpa genab dooglagnu ahom. <sup>8</sup> Nug am amahlak amu iita amge nug amahlak amunu mehuqkununu ahom.

<sup>9</sup> Amahlak amuam amahlak genab. Nug wanpa udia amu danab ah oh amahlak madate. <sup>10</sup> Ao, Kristus, onig laa Nai, nug wanpa dayom, wan imu amu Nug he beum amge wanpanu danab ah ag Nug ii doopig. <sup>11</sup> Nug keeke heumpa na dayom amge danab ag Nug do ii metan ii aopig. <sup>12</sup> Amge laala ag Kristus aopig amu ag aaku Kayak bekod daaglagnu gagatag matom. <sup>13</sup> Ag tiig makulakpa amu bedunu kobolpa, o danabnu dab makpa, ag Kayak bekod ii bepig. Iita! Kayak Nug he, ag Nug bekod bepig.

14 Am Kristus, onig laa Nai, Nug danab bedu awa, ig oonigpa dayom. Nug am Kayak beka laipunab amunu nuhig binag okai ele dayeye, ig Nug binag amu okai anidmut. Amu genabnu diig amu ehanitak okai hamu metak kobol ele amuam nuhigpa am baknab ele daate. 15 Amu Johannes nug nuhignu nai mehuqaqa ewa aum. “Da anuka nuhignu matimi ele amu aaku. Da ami. ‘Nug da dim lamida udite, Nug am da edilak. Adinu? Da ii daami haenpa amu, Nug haen amupa ele dayom,’ ” awa aum. 16 Keeke ena oh amu nuhigpa am bak daate amunu ig nuhigpa ehanitak diigdiig aaku aomut. 17 Yo, do amu ig Moses nuhigpa aomut amge ehanitak okai hamu metak kobol am keeke genab ele amu ig Kristus nuhigpa aomut. 18 Danab laipu laa nug haen laa Kayak ii antom. Iitanab. Kayak Beka laipunab, Nug Kayak ele ou qak daatep amu, Nug aakuib anita doya, Kayak ipunikom.

### *JOHANES UDAT DIG MEUM*

19 Aria ded laa Juda okai ag mana metak danab amu Lewi budub danab laa ele Jerusalem apanu Johannes nuka nuhignu od metaglagnu maateg gona, “Na am aun?” ana od metaeg, 20 Johannes nug ag amelagpa, “Da am Kristus iita,” akunu ii uuom. Iita, nug miag nai mehuqaqa, “Da am Kristus iita,” awa aum. 21 Anam a amu ag apig. “Anam daate dayeb amu na am aun? Na am Eliaste?” aon apig. Aeg amu nug aum. “Da am nug iita.” Nug anam a amu ag apig. “Ge na nug iita daatem dayeb amu na am propet laa udikunu, ig nug ameg metem ele amute?” aon apig. Ag anam aeg amu nug, “Iita,”

awa aum. <sup>22</sup> Anam a amu ag apig. “Ehe! Ig danab meikeg udimut ele amu ahilag od mak nob edugnignu am na naka nahipnu amu adinab atem?” aon apig. <sup>23</sup> Ag anam aeg amu Johanes nug inam aum. “Da amu, baag laa propet Jesaia aum bia, atu tadakpa, ‘Ag oolagpa Nadinu ib babaiteg!’ awa ete,” awa aum. <sup>24-25</sup> Anam daye amu maateg udipig ele amu ag oolagpanu laala ag do gumak danab-Parasia daapig amu ag Johanes od metan apig. “Na Kristus iita, Elias iita amu propet ele iita. Anam dayeb amu na adinu danab ah layadtem?” <sup>26</sup> Ag anam aeg amu Johanes amelagpa aum. “Da amu ag lepa layadtem amge ag oolagpa apa laa hibaitom daate ele amu ag Nug ii dooteb. <sup>27</sup> Danab amu Nug da dimulpa udite amge dahil hak amu nuhig ele, elele iita, Nug am da edilak,” awa aum. <sup>28</sup> Johanes nug Jodan lepa danab layatete, keeke imu oh amu Betani apa beum. Betani amu Jodan le laih apa dayom.

### *JOHANES KAYAKNU SIPSIP NAG IPUANATOM*

<sup>29</sup> Wagkade ded amupa Jesus Nug Johanes gumita udieye, Johanes Nug anta aum. “Anteg, Kayaknu Sipsip Nag, Nug wanpan danab dilag hipunin uhuqte ele amu, Nug am uuqu. <sup>30</sup> Am danab umu aakuib da nuhignu inam ami. ‘Danab Nug da dimulpa udite ele amu, Nug da edilak. Adinu? Nug anukanab da ii daami haenpa ele, Nug dayom.’ <sup>31</sup> Laa ele, Nug Kayaknu sipsip nag daakunu matu ii doomi amge da Israel danab Kayaknu Sipsip Nag ipuanadkulnu udien, danab ah lepa layadtem,” awa aum.

<sup>32</sup> Johanes anam anana amu nug nai tudita aum. “Da Kayak Oudi Nug hab atannu, ai upudil bia na, Nug qadepa dayeye anidmi. <sup>33</sup> Da ele Nug ii doolom amge laa Nug da danab ah lepa layadkulnu meide udimi ele amu, Nug a doomi. Nug aum. ‘Kayak Oudi Nug na, danab laa qadepa daaku amu danab amu aakuib Nug geha Kayak Oudipa layadku,’ awa aum. <sup>34</sup> Amu da anidmi, nuhignu da maditem ele amu, Nug am Kayak beka.” Johanes anam aum.

*JESUS IPUNITAK AWAK DANAB DIG MA DIIOM*

<sup>35</sup> Aria ded amu uue wagkade, ded amupa Johanes nug baula apa dayeye, nuhig ipunitak awak danab adit ele daapig. <sup>36</sup> Ag anam daanna, nug Jesus oieye anta aum. “Anted! Umu am Kayaknu Sip-sip Nag,” awa aum. <sup>37</sup> Nug anam a amu ipunitak danab adit a Johanes nai aum amu a dooya, a Jesus dim lamiteheh, <sup>38</sup> Jesus Nug edua anata, Nug aum. “A adi maditep?” awa aum. Nug anam a amu a apid. “Rabi na adepa daatem?” aoi apid. Rabi eduak am ipunitak danab. <sup>39</sup> Aeh amu Nug aum. “A doya, da daatem aben anted!” Nug anam a amu a Nug dim lamiteh gona, Nug daate aben amu anidpid. A Nug ele oh gopig, amuam aam ameg wadele anam amu ded amu, haen amu uke tueb batak a Nug ele apa daapig. <sup>40</sup> Aria nid adit Johanesnu nai dooya, Jesus dim lamidpid ele, amunu oolahpa laipu laa nug onig Andreus, nug Simon Petrus ele, a am eamag. <sup>41</sup> Amu nug paha uka, Simon anta, nug amegpa aum. “I Mesias aaku anidmu,” awa aum. Mesias diig amu danab laa Kayak Nug Nug wan imu ohnu okai daakunu epediom. Grik naipa

Mesias ed<sup>u</sup>ak amu Kristus. <sup>42</sup> Anam anana amu Andreus nug Simon omala, Jesus topa ukom. Uke Jesus anta, amegpa aum. “Simon, Johanes beka, nahipnu ag ge<sup>h</sup>a Sipas akulag,” awa aum. Grik naipa Sipas ed<sup>u</sup>ak amu Petrus. Onig adit amu oh me<sup>u</sup> am men.

### *JESUS PILIPUS NATANIEL ELE ONILAHPA EUM*

<sup>43-44</sup> Wakade, ded amupa Jesus Nug Galelia gokunu dab maama, Nug Pilipus, nug am Betsaida ted, nug Andreus Petrus ele, ag oh apalag laipu amu, Jesus Nug nug ma<sup>t</sup>ia anta amu nug amegpa aum. “Na da dimamide!” awa aum. <sup>45</sup> Anam a amu Pilipus nug Nataniel ma<sup>t</sup>ia anta, amegpa aum. “Danab Moses nug anuka do naipa nuhignu yom, propet ag ele nuhignu yaapig amu ig aaku anidmut. Nug am Josep beka Jesus, Nasaret ted,” awa aum. <sup>46</sup> Nug anam a amu Nataniel nug aum. “Nasaret upanu amu keeke ena anam laa ii udima,” awa aum. A amu Pilipus nug aum. “Dona ante!” awa aum. <sup>47</sup> Pilipus nug anam a, Nataniel nug Jesus anidkunu udieye, Jesus Nug anta, Nug aum. “Anteg! Umu am Israel ted genab. Nug oopa am ham bupuak laa iita,” awa aum. <sup>48</sup> Anam a amu Nataniel Jesus od metom. “Atemun na da dooidme?” awa od metom. Nataniel anam a amu Jesus odepa awa aum. “Pilipus nug na oninpa eum, haen amu ii nak, da na ad onig pig waapa dayeye anidmi,” awa aum. <sup>49</sup> Jesus anam a amu Nataniel odepa awa aum. “Ipunitak danab, na am Kayak beka, na Israel dilag King,” awa aum. <sup>50</sup> Anam a amu Jesus Nug Nataniel odepa awa aum. “Da na ad pig waapa anidmi ami amunute na

ootpa genab dootem? Na keeke amu editak, laa ele geha anidkut,” awa aum. <sup>51</sup> Jesus Nug anam anana, Nug nai baula ele tudita aum. “Da genabnab genab ag amelagpa atem, geha hab obateb, Kayaknu engel ag Danab Bekalag da, da gumidna nenan tebepeg anadkulag,” awa aum.

## 2

### *JESUS NUHIG UDAT DIG MEUM*

<sup>1</sup> Aria ded adit uue, ded ewampa, ab onig Kana, Galelia wanpa, apa danab laa ah aokun heum. Jesus anig nug hobul amupa danab amu laugpa dayom amu <sup>2</sup> ag Jesus Nug nuhikud ipunitak awak danab ele, ag oh ele hobul amupa daaglagnu onilagpa epig. <sup>3</sup> Ag anam eeg daaegeg, dimpa danab amu ahilag wain iita me, Jesus anig nug Jesus amegpa aum. “Wain ahilag iita meum,” awa aum. <sup>4</sup> Nug anam a amu Jesus Nug amegpa aum. “Anai, imu am i ohnu keeke iita. Da keeke danab hekunu elele iita, amu hekulun haen iite doum?” awa aum. <sup>5</sup> Jesus anam a amu anig nug begbeg danab amelagpa aum. “Nug nai laa amelagpa ab amu ag Nug ode dim lamiteg!” awa aum. <sup>6</sup> Amu le itaknu hanak menpa hak eblaih laipu ele, Juda ag haen oh ahilag kobolpa amupa le laaglagnu meeg daapig. Hanak amu anen anen le hai gokod 100 keeke inakunu elele. <sup>7</sup> Amu Jesus Nug begbeg danab amelagpa aum. “Ag le itapeg, hanak am beig!” awa aum. Nug anam a amunu ag le itaeg, hanak amu oh am bena, agap bepig. <sup>8</sup> Hanak am beeg, Nug aum. “Laa itapeg nob, aon gona, e gumak danab okai amu meteg!” awa aum. Nug

anam a, ag aon gona, <sup>9</sup> nug metæeg amu e gumak danab okai nug le geha wain eduom amu baag dookunu nakok laum. Nug wain amu adepanu amu nug ii doyom amge begbeg danab le itapig ele amu ag doopig. Aria e gumak danab okai nug wain amu nakok lawowa, nug danab ah aote ele, danab amu onigpa eum. <sup>10</sup> Onigpa e udie amu nug aum. “Danab oh ag wain ena amu tatam mataeg laeg, dimpa amu ag wain nakok nau bia amu madateb. Amge na am wain ena amu hagaka awe dayom, geha iiku wain ena aon dome,” awa aum. <sup>11</sup> Aria Jesus Nug amu heum amu amupa Nug eponak keeke danab hekunu elele iita, kobol amu hekunu dig ma heum. Nug Kana abpa, Galelia wanpa anam ha, amupa Nug nuhig gagatag ipuanate, nuhikud ipunitak awak danab ag nuhignu oolagpa genab doopig. <sup>12</sup> Hobul amu male, Jesus Nug anig, laikud amu nuhikud ipunitak awak danab ele ag Kapenaum apa nona, nakok daapig.

### *JESUS JUDA DILAG MANA METAK LAKA UKOM*

<sup>13</sup> Apa daaegeg uke, Juda dilag Pasowa metid hobul guguitete, Jesus Nug Jerusalem apa ukom. <sup>14</sup> Apa mana metak lag oopa danab ag bulmakau, sipsip, amu upudil ele ag daden meegeg anatom. Amu danab men dodo baoliteb ele amu, ag ele daaegeg anatom. <sup>15</sup> Jesus Nug anam anata, Nug matadaknu keeke mudipa aka, danab mana metak laka daapig ele amu ahilkad sipsip, bulmakau oh lamataa amu Nug danab balalpa men dodo baolina daapig ele amu ahilag men dodo gokade no, balal ele huma awe, na qeum. <sup>16</sup> Na qe, danab ai meeg daden mepig ele amu amelagpa aum.

“Keeke amu akan ukeg! Ag da Mamel laug amu aib hepeg, en lag bia dayom!” awa aum. <sup>17</sup> Jesus anam a, nuhikud ipunitak awak danab ag Kayak naipa, nai daate, amu daulagpa doum. Nai amuam inam. “Da na lautnu ool huanak daate amunu da na laut ena daakunu wagai metem.”

<sup>18</sup> Anam daye amu Juda ag amu anidna, ag Jesus amegpa apig. “Na adi eponak keeke, danab hekunu elele iita laa hepe, ig anidta amu na gagatag amupa daatem amu ig doognig?” aon apig. <sup>19</sup> Aeg amu Jesus Nug ag odelagpa awa aum. “Ag mana metak lag imu ag hepeg nauheb, da ded ewam oopa da edue bapaidkul,” awa aum. <sup>20</sup> Jesus anam a amu ag apig. “Mad 46 anam ag mana metak lag imu henan daapig, amu na ded ewam oopa hekutnu atemte?” aon apig. <sup>21</sup> Amge Jesus Nug mana metak lagnu ii aum. Iita. Nug bedunu aum. <sup>22</sup> Amunu dimpa Jesus Nug modpa mauhak oolagpanu edua hibaite amu ipunitak awak danab ag Nug anuka aum amu daulagpa do, ag nai yak, amu nai Jesus Nug aum, amu ele oolagpa genab doopig.

<sup>23</sup> Amu Jesus Nug Pasowanu metid hobul amu apa dayaya, eponak keeke, danab hekunu elele iita kudum heehe, danab ag anidna, nuhignu oolagpa genab doopig. <sup>24</sup> Amge Jesus Nug danab ah dilag dab mak, ag Nug ahilag wan imupan okai daakunu mekulagnu dab mepig, dab mak amu doyom amunu ag anam hemananu Nug nuka Nug awaitom. <sup>25</sup> Nug danab dilag oh doyata malom. Danab laipu laa nug danab dilag dab mak amu amegpa akunu elele iita. Nug nuka danabnu dab



mak oh doya malom.

### 3

#### *JESUS NIKODEMUS ELE NAI MADIPID*

<sup>1</sup> Aria do gumak danab-Parasia laa onig Nikodemus, nug am Juda dilag iki, <sup>2</sup> danab amu nug tuqan Jesus gumita u<sub>dia</sub>, Nug amegpa aum. “Ipunitak danab, ig dootem, na am ipunitak danab Kayak topanu u<sub>dime</sub>. Ante, Kayak Nug danab laa ii ehaniteb amu nug eponak keeke, danab hekunu elele iita, na hetem ele amu, nug hekunu elele iita,” awa aum. <sup>3</sup> A amu Jesus odepa awa aum. “Da genabnab genab na amenpa atem. Danab nug bau menuak ii aoku amu nug Kayaknu do madod ii anidma,” awa aum. <sup>4</sup> Jesus anam a amu Nikodemus nug amegpa aum. “Danab nug kaino daate amu nug atemun edua bau menuak aoku? Nug baula anig oopa nob, anig nug edua menukunu elelete?” awa aum. <sup>5</sup> Nikodemus anam a amu Jesus odepa awa aum. “Genabnab genab da na amenpa atem. Danab nug lepa, amu Kayak Oudipa ele menuak ii aoku amu nug Kayaknu do madod oopa gokunu elele iita,” awa aum. <sup>6</sup> Danab nug bedu bau daakunu, amuam anig mameg dilahpa aote amge danab nug oiyak bau, hanhan dayaknu amu, nug amu Kayak Oudi epegpanu aote. <sup>7</sup> Anam daate amu da na bau menuak aokutnu ami amu na amunu dab mak kudum aib aome. <sup>8</sup> Am ulah nug adekupanu u<sub>dia</sub>, aten gotem amu na ii dootem, nug ukak nuhigib dim lamidte amu na nuhig oqoti aakuib dootem. Amubia danab ah Kayak Oudipa bau menuak aoteb ele amu, danab ag amunu

diig oh anidna, oolag maidkunu elele iita,” awa aum. <sup>9</sup> Jesus anam a amu Nikodemus odepa awa aum. “Keeke amu nug atemun anam beku?” awa aum. <sup>10</sup> Nug anam a, Jesus baula Nikodemus odepa awa aum. “Na amu Israel dilag ipunitak danab okai am atemun na keeke imu ii dootem? <sup>11</sup> Genabnab genab da na amenpa atem. Keeke ig dootem ele amu ig amunu mehuqtem, keeke ig anidtem ele amu ig amunu maditem amge ihinig matiak amu ag dab ii medteb. <sup>12</sup> Da wan kobolnu matii, ag oolagpa genab ii doopig amunu atemun da hab atan kobolnu madipi, ag oolagpa genab dooglag? <sup>13</sup> Laipu laa nug hab atan ii teum. Iita. Danab Bekalag da aakuib apa dayeye, hab atannu udimi. <sup>14-15</sup> Anuka atu tadakpa mat nau ag Israel oolagpa bena, danab ah emalateg mauheg am Kayak Nugib Moses amegpa a, mat dotog laa braspa ha qape, danab ag amu neegna anidna, ag ii mauhpig, amubia danab aun adi ag dahilnu oolagpa genab dooglagnu, ag bauklel hanhannu aon, hanhan bau daaglagnu, ag Danab Bekalag da, ad emaitakpa aihidkulag.

<sup>16</sup> Kayak Nug wan imupan danab oh dilag oo huana mauhom amunu Nug Beka laipunab me udiom. Nug me udiom amunu aun nug nuhignu oopa genab doote ele amu, nug padal ii mema. Iita! Nug bauklel daaku. <sup>17</sup> Kayak Nug, Nug beka wan imupa me udiom amge Nug danab ah epediadkunu me ii udiom. Iita. Kayak Nug nuhigpa danab ah oh edua diiadkunu me udiom. <sup>18</sup> Am aun nug nuhignu oopa genab doote amu nug nob nau awaknu hetodiakpa ii daate amge aun nug

nuhignu oopa genab ii doote amu nug aaku nob nau awaknu hetodiakpa teum daate. Adinu? Nug Kayak beka laipunab amu nuhignu oopa genab ii doyom. <sup>19</sup>Nob nau awaknu hetodiak diig amu iiku, amahlak wanpa udiom amge danab ag wanpanu gatatu amunu oolag heum, ag amahlaknu oolag ii heum. Adinu? Ahilag kobol am nau. <sup>20</sup>Amunu am danab oh ag hak naupa daateb amu ag amahlaknu keked. Ahilag hak nau miag atimanu amu amahlakpa daaglagnu oolag ii daate. <sup>21</sup>Amge laa nug kobol genabpa daate amu nug nuhig kobol amu Kayak Nug a doya heum amu miag atiak anidkulagnu amahlakpa daate,” awa aum.

### *JOHANES JESUSNU UDAT AMUNU DIIG PEHETA IHUHUOM*

<sup>22</sup>Anam mati malaeh, dimpa Jesus Nug nuhikud ipunitak awak danab ele ag Jerusalemmu ahan, Juda wanpa aben laih gona, Nug ag ele ded laala daanna, danab ah layatom. <sup>23</sup>Johanes nug ele Inon, am Salen guguitak, apa le kudum ele amunu nug apa danab ah layatete, ag udin layatak aopig. <sup>24</sup>Herodes nug Johanes mani guitak ii inom, haen amupa layatak amu dayom. <sup>25</sup>Anam heegeg, Johanesnu ipunitak awak danab laala ag Juda danab laa ele, ag danab Juda dilag dopa opia awak daakunu nai madipig. <sup>26</sup>Ag anam matina amu Johanesnu ipunitak awak danab ag gona, Johanes amegpa inam apig. “Ipunitak danab, danab laa Nug na ele anuka Jodan le laihpa daaiya, na nuhignu matime ele, danab amu Nug danab layatete, danab ah oh nuhigpaib goteb,” aon apig.

<sup>27</sup> Anam aeg amu Johanes odelagpa awa aum. “Kayak hab aṭannu, Nug keeke laa danab epegpa ii meeb amu danab nug nuḱa nuhig dab makpa keeke amu aokunu elele iita. <sup>28</sup> Ag aka ele anuḱa da inam maṭiyi doon malapig. ‘Da am Kristus iita amge Kayak da meide, da nuhig ib bapaidkulnu anuḱe uḱimi.’ <sup>29</sup> Amunu amu da am nid baunu kadoi bia. Nid bau nug ah aote amu ah amuam nuhigib amge kadoi nuhig nug layag ah bau awom doya, oo gamag ahate. Nid baunu kadoi nug oo gamag ahak amu doote amubia da Jesusnu oolpa gamag ahak okainab dootem. <sup>30</sup> Nug onig amu okainab daaku, da amu nug waapaib daakul.

<sup>31</sup> Am laa Nug hab aṭannu nete amu Nug keeke oh editak daate. Laa nug wanpa bete amu nug wan imupanu keekeib madite. Laa Nug hab abpanu nete amu Nug keeke oh editak. <sup>32</sup> Laa Nug hab aṭannu neum amu, keeke Nug doya malom amu keeke Nug antom ele, Nug amunu madite amge laala ag oolagpa genab ii dooteb. <sup>33</sup> Amge danab nug nuhig maṭiak doya dab medate ele amu, nug Kayak Nug genabnu diig daate, nug amu oopa gagaṭag genab doote danab ah ipuanadte. <sup>34</sup> Yo, laa Kayak me uḱiom amu Nug Kayak nai madite amu Kayak Nug nuhig Oudi am bak medate. <sup>35</sup> Mame Kayak Nug Beḱanu oo mauhte amunu keeke oh Nug epegpa meum. <sup>36</sup> Am laa nug Kayak beḱanu oopa genab doote ele amu, nug bau dayak hanhannu awom daate. Laa nug nuhig nai dim ii lamidte amu nug bau dayak hanhannu ii awom. Iita. Opoḱi bak, Kayak Nug danab dilag hipuninnu doote ele amu, opoḱi bak amu nuhigpa daate,” awa aum.

## 4

*JESUS SAMARIA AH ELE NAI MADIPID*

<sup>1</sup> Haen amupa do gumak danab-Parasia ag, “Jesus Nug Johanes edita, danab ah kudum diia layadte,” nai anam doopig. <sup>2</sup> Amge Jesus ii layatom, nuhig ipunitak awak danab ag layadpigi. <sup>3</sup> Do gumak danab-Parasia ag nai amu doyeg, Jesus Nug amu doyom amunu Nug Juda atu uua, edua Galelia ukom.

<sup>4</sup> Nug Galelia gokunu ib elab ukak uua, Samaria opata wana, Galelia gokunu ugaka, <sup>5</sup> Nug Samaria ab okai laa onig Saika, apa teum. Ab amuam Jakop nug beka Josep wan metom, amu guguitak. <sup>6</sup> Anuka Jakop nug apa le mod nuhig buuom. Amu Jesus Nug uka, amupa ta, bedu bahi yom amunu Nug le mod amu guguitak hik awa, apa dayom. Haen amu aam ameg tutuku anam. <sup>7-8</sup> Jesus Nug dayeye, nuhikud ipunitak danab amu ag e daden mekulagnu ab okai amupa gopig. Amu Samaria ah laa le itakunu udiom. Udie Jesus Nug ah amegpa aum. “Na le aon dope lai!” awa aum. <sup>9</sup> Nug anam a amu Samaria ah nug aum. “Na amu Juda danab, da am Samaria ah. Amu atemun na, ‘Le aon dope lai!’ aon atem? Da am Samaria ah, Juda ag Samaria ele ou qak ii oiteb,” awa aum. <sup>10</sup> Ah anam a amu Jesus odepa awa aum. “Na Kayak Nug do medakunu hete doolom amu na danab aun Nug nahipnu, ‘Na le aon dope lai!’ aum ele amu, na Nug amegpa ape, Nug na le bauklel ele amu metalo,” awa aum. <sup>11</sup> Jesus Nug anam a amu ah nug aum. “Danab Nadi, na le itakutnu tapid iita am le mod imu ele umanab unuqagnab daate amunu

amu na le bauklele ele amu adepanu aokutnu ame?  
<sup>12</sup> Am ig alanig Jakop, nug le mod imu mekom. Nug bekod amu nuhikud bulmakau, sipsip ele ag anuka le imu ladapig ele amu, na nug edidtemte? Iita!” awa aum. <sup>13</sup> Ah anam a amu Jesus odepa awa aum. “Danab oh ag le mod imupanu le lateb ele amu, ag le lapeg, haen oh le baalag baula diiku <sup>14</sup> amge laa nug le da medatem ele imu, nug amu laku amu nug baula le baag ii diima. Iita. Le da medakul ele imu amu le mod bia nug oopa baaba daaku. Anam haen oh qepudia baaba, nug bau dayak hanhannu medaku,” awa aum. <sup>15</sup> Jesus anam a amu ah nug Jesus amegpa aum. “Nadi, le amu da mede! Medape, da baula le baal ii diima, ipa haen oh le itakulnu ele ii udipa,” awa aum. <sup>16</sup> Anam a amu Jesus Nug amegpa aum. “Gona, na gamut ape doyeb, eduya udied!” awa aum. <sup>17</sup> Anam a amu ah nug Jesus odepa awa aum. “Da danab iita,” awa aum. Anam a amu Jesus amegpa aum. “Na danab iita atem am na genab atem. <sup>18</sup> Adinu? Danab tanig ele ag tatam na gamutad daapig amu danab laa gemu na ele daatep amu nug am na gamut iita,” awa aum. <sup>19</sup> Jesus Nug anam a aria ah nug Jesus amegpa aum. “Danab Nadi, da aaku na dooidmi, na am propet amunu <sup>20</sup> na ape doyei! Ig mamenkad amu ag qauko imupa Kayak binag medapig, gemu ig ele hetem amge ag Juda amu, ag danab ah oh Jerusalem apa binag mekulagnu ateb, amu ig atem hekunig am ena?” awa aum. <sup>21</sup> Anam a amu Jesus odepa awa aum. “Ah, na dahil nai ootpa genab doye! Haen elab iita ag baula Mame Kayak Nug binag

mekulagnu amu qauko imupaib binag ii memana o Jerusalem apaib ele Mame Kayak Nug binag ii memana. <sup>22</sup> Samaria ag amu ag Kayak binag meteb amu ag nuhig diig pehetak ii dooteb amge edua diiaknu udat amu ig Juda ihinigpa bete amunu ig Nug binag metem amu ig nuhig diig tutuku dootem. <sup>23</sup> Amge haen aaku udiom, danab ag binag mak genab hekulagnu amu ag Kayak Nug diig ipunikom dab menana, ag Kayak Oudi ehanitakpa ele Mame binag mekulag. Binag mak anam amu Mame Nug oo daate. <sup>24</sup> Kayak Nug am Oudi amunu danab ag Nug binag elele mekulagnu amu ag Nug diig ipunikom dab menana, ag Oudi ehanitakpa ele binag mepeg, elele beku,” awa aum. <sup>25</sup> Jesus anam a amu ah nug Jesus amegpa aum. “Da Mesias udikunu aeg doomi, Nug am Kristus ateb. Nug udia, keeke oh danab ah ipuanadku,” awa aum. <sup>26</sup> Ah nug anam matie amu Jesus amegpa aum. “Da na ele nai maditep imu amu daib am Nug aaku,” awa aum.

<sup>27</sup> Jesus anam aawo, haen amupa nuhikud ipunitak awak danab ag edun udin, Jesus Nug ah ele nai matieheh anatna, ag dab mak kudum aopig amge laipu laa nug ah amegpa, “Na adin oot hete?” awa oot ii metom. O iita, laa nug Jesus amegpa, “Na adinu nug ele nai maditep?” od ii metom.

<sup>28</sup> Anam daaegeg, ah nug le itakunu hanak nuhig uue dayeye, edua abpa uka, danab amelagpa aum. <sup>29</sup> “Dona, danab imu anteg! Nug keeke oh da anuka hemi amu miag amelpa aum. Nug am Kristustai?” awa aum. <sup>30</sup> Aria danab ag ahan, ab uuna, Jesus gumidna udipig. <sup>31</sup> Amge haen

gamag amupa nuhikud ipunitak awak danab ag Jesus amegpa apig. “Ipunitak danab na e la!” aon apig. <sup>32</sup> Amge Nug aum. “Da e laa ele, ag e amu ii dooteb,” awa aum. <sup>33</sup> Nug anam a amu ipunitak awak danab ag aka aka nug od metan apig. “Danab laa e nuhig awa uḍia metomtai,” aon apig. <sup>34</sup> Ag anam maṭiegeg amu Jesus Nug aum. “Laa Nug da meide uḍimi ele amu da Nug ode dim lamitete, nuhig uḍat oh hein malakul amuam e dahil. <sup>35</sup> Ag inam aon aṭeb. ‘Kalam wadele uueb, e oduak haen doku,’ aon aṭeb. Amge da ag amelagpa aṭem. Ag amelag humana, atu oh italna anteg. E oh odun malapig. <sup>36</sup> Am laa nug meu aote amu nug nuhig uḍat nob awawa, nug danab laala bauklel hanhannu aoglagnu ehanadte. Ehanadte amunu e epak danab amu meu awak danab ele a oh oolah gamag ahaku. <sup>37</sup> Anam daate amunu nai imu am genab, ‘Danab laa nug e ebaṭe amu laa nug meu aote’. <sup>38</sup> Da danab laa uḍat hepigpa ag dahilad, gemu daateb amu, ag dad amupa meu aoglagnu maati gopig. Laa ag tatam ahilag wagai makpa dad oopa e ebapig amu ag oopa nona meu aoteb,” awa aum.

<sup>39</sup> Aria Samaria kudum ag ahnu nai doona, ag Jesusnu oolagpa genab doopig. Aḍinu? Ah nug, “Da anuka keeke oh hemi amu Nug da amelpa aum,” awa aum. <sup>40</sup> Amunu Samaria danab ag Jesus gumidna donana, Nug ag ele daaglagnu unuqidpig. Unuqiteg amu Jesus Nug ded adit ag ele ab amupa daapig. <sup>41</sup> Anam daanna, danab kudumnab ag nuhig nai doona, oolagpa genab doopig. <sup>42</sup> Oolagpa genab doona amu ag ah amu amegpa apig. “Ig na ame amupa oonigpa genab ii



doomut. Iita. Ig ika ele Nug odep̄a a doomut amupa ig aaku dootem, Nug am genab ig wan imupanu danab ah edua awikak danab,” aon apig.

*JESUS GABMANNU IKI DANABNU NID BABAITOM*

<sup>43</sup> Ded adit amu uue, Jesus aha, Galelia ukom amge apag diigpanab ii ukom. Adinu? <sup>44</sup> Jesus Nug nuk̄a anuka, “Propet nug apag diigpa amu onig iita,” awa aum. <sup>45</sup> Amu Nug uka, Galelia te, Galelia danab ag ele Pasowanu metid hobul nadipa gona, ag Jesus Jerusalem apa metid nadipa udat heehe anidpig amunu ag nuhignu oolag gamag ahom.

<sup>46</sup> Aria Jesus Nug Galelia wanpa oiyaya, ab onig Kana apa ukom. Ab amupa Nug anuka le he, edua wain beum. Apa dayeye, Kapenaum abpa gabmannu iki danab laa amu nug beka ode ele dayom. <sup>47</sup> Haen amu danab amu nug Jesus Judanu aha, Galelia teum doya, nug ab, Jesus Kapenaum uka heeb, beka ena daakunu unuqidkunu ukom. Adinu? Nug beka ode ele amu nug mauhkunu miag dayom. Danab amu uka, Jesus gumita ta, nug bekanu Jesus unuqite <sup>48</sup> amu Jesus Nug nug amegpa inam aum. “Da hepi, ag eponak keeke, danab hekunu elele iita diigdiig ii anidkulag amu ag oolagpa genab ii dooglag,” awa aum. <sup>49</sup> Nug anam a amu gabmannu iki danab nug aum. “Nadi, nid dahil mauhmanu paha ne!” awa aum. <sup>50</sup> Nug anam a, Jesus Nug amegpa aum. “Na oot ug aib dayom. Na uke! Na bekat nug bau ena daaku,” awa aum. Danab amu nug Jesusnu nai doya, oopa genab doya, nug ukom. <sup>51</sup> Nug ugeke amu begbeg nuhikud ag udin, ibpa anidna amegpa apig. “Na

bekāt nug bau meum daate,” aon apig. <sup>52</sup> Anam aeg amu nug oḍ maṭom. “Aam ameg aṭenpa nug ena daakunu dig meum?” awa oḍ maṭom. Oḍ maṭe amu ag apig. “Tumai belo bek, wan kilok amu beḍu gakaḍak oug meum,” aon apig. <sup>53</sup> Aeg amu nug aam ameg amupanab Jesus Nug, nug bekanu amegpa aum doyom amunu nug nuhikudpa ele ag oh oolagpa genab doopig. <sup>54</sup> Jesus Nug Judanu Galelia uḍia amu eponak keeke, danab heḱunu elele iita namba tu aaku heum.

## 5

### *JESUS BETSAIDA APA DANAB LAA BABAITOM*

<sup>1</sup> Keeke amu oh ba male amu dimpa Juda dilag Pasowa metid hobul laa beum. Be amu Jesus Nug Jerusalem ukom. <sup>2</sup> Jerusalem ab aḍubnu od laa onig Sipsip Dilag Od, od amu guguitak amu le ameg laa dayom. Arameik naipa amu ag, ‘Betsaida,’ aon aṭeb. Le amu agapa danab daaglagnu ag ulah lag tanig ele, gediak iita hepig. <sup>3</sup> Lag amupa oḍe danab kudumnab, amelag gaḍuak, didilag aḍak, bedulag laih mauhak, ebehilag kaliatak ele daapig. [Ag le uḍalak ameg mena daadtapig. <sup>4</sup> Haen laala engel nug le amupa na, le amu uḍaltom. Le uḍala male amu, aria danab aun nug tatam anuqa lepa notom amu nug oḍe nuhig aṭemutai ele amu haen agupa nug ena daatom.] <sup>5</sup> Aria danab laa apa dayom amu nug maḍ 38 didi aḍak daatom. <sup>6</sup> Jesus Nug danab amu niieye anta, Nug oḍe haen elab niiom amu Nug doya, danab amu oḍ meṭom. “Na ena daakutnu oot daatete?” awa aum. <sup>7</sup> Awa a amu oḍe danab oḍepa awa aum. “Danab nadi, haen le

imu udalte amu danab laa da ehanida, le umupa meidkunu laa iita. Da daka le amu oopa nokulnu heiyi amu laa ag da qe edilna, ag tatam anuqna noteb,” awa aum. <sup>8</sup> Danab anam a amu Jesus Nug danab amegpa aum. “Na hipaidna, niiak keeke nahip aon, maon uke!” awa aum. <sup>9</sup> Jesus anam a amu pahanab danab bedu ena daye, niiak keeke nuhig mawa, tapa ukom.

Jesus Nug amu heum amu Nug Juda dilag Metidpa heum <sup>10</sup> amunu Juda okai ag danab niiak keeke mawom ele amu amegpa apig. “Gemu am Metid, na niiak keeke maomnanu do date. Na aib tipalme,” aon apig. <sup>11</sup> Aon aeg amu danab odelagpa awa aum. “Danab Nug he, da ena daami ele amu, Nug da amelpa, ‘Na niiak keeke nahip maon uke!’ aum,” awa aum. <sup>12</sup> Nug anam a amu ag danab od medapig. “Laa Nug na niiak keeke nahip maokutnu aum amu, danab amuam aun?” aon apig. <sup>13</sup> Ag anam od medapig amge danab bedu ena dayom ele amu, nug danab aun he, nug ena dayom ele amu nug ii doyom. Adinu? Danab, ah, nid naunau ele kudumnab amunu Jesus Nug ag oolagpa uka qetodom. <sup>14</sup> Danab amu nug Jesus ii doyom amge dimpa Jesus Nug danab amu mana metakaka apa anta, amegpa aum. “Ante! Gemu na bedun paha etom. Ug nadinab na tonidmanu amu na baula hipunin aib heme,” awa aum. <sup>15</sup> Jesus anam a amu danab amu nug uka, Juda okai ame-lagpa aum. “Danab Nug he, da ena daami ele, Nug am Jesus,” awa aum.

<sup>16</sup> Nug anam a, Jesus Nug keeke amu Juda dilag Metidpa heum doopig amunu diig amupa Juda

okai ag Jesus ug metaglagnu dig mena ib madipig. <sup>17</sup> Ag anam hepig amge Jesus Nug amelagpa aum. “Mama Nug hanhan udat heeche udiom, gemu ele haaha daate amunu da ele udat hetem,” awa aum. <sup>18</sup> Amupa Juda ag Jesus qepeg mauhkununab oolag dayom. Adinu? Nug Metidnu doib ii tipalom. Iita! Nug, “Kayak Nug am da Mamel nab,” aum amunu nai amupa Nug Kayak ele laipu ipuanatom. <sup>19</sup> Juda okai ag amunu ehed doopig amunu Jesus Nug amelagpa inam aum. “Genab nab genab, da ag amelagpa atem. Kayak Beka da, dahil dab makpa keeke laa ii hetem. Iita. Da Mamel he anidmi amu da ele anamib hetem. Keeke oh Mama hete amu Nug Beka da, da ele hetem. <sup>20</sup> Mama Nug dahilnu oo mauhte amunu keeke oh Nug hete ele amu, Nug da ipunidom. Nug geha udat kudum okainab, keeke amu oh editak ele, ag oolag otai kunu, ipunidku. <sup>21</sup> Mama Nug laa mauhpig ele amu mad ate ahaeg, bau dayak madate, amubia Nug Beka da, da ele laala bau dayak madakulnu ool daate amu da madatem. <sup>22-23</sup> Mama Nug danab laa ii epedite. Iita, Nug danab ah oh ag Nug binag meteb, amubia da binal mekulagnu epediak udat amu oh Nug Beka da, da epelpaib meum. Am danab nug Kayak Beka da, da binal ii mete amu Mama, Nug da meide udimi ele amu, Nug binag ele ii mete.

<sup>24</sup> Da genab nab genab ag amelagpa atem. Laa nug nai dahil doya, laa Nug da meide udimi amu nuhignu ele oopa genab doote amu nug bau dayak hanhannu ele, nug padal maknu epediak ii anidma. Iita. Nug aaku mauhaknu ib uua, gemu nug bau dayak hanhannu ibpa daate. <sup>25</sup> Da genab nab genab ag amelagpa atem. Haen laa

udikunu hete, gemu iiku udiom amu, mauhak adi ag Kayak Beka da, da baal dooglag. Am danab amu oolagpanu aun adi ag amu doona amu ag bau daaglag. <sup>26</sup> Mama Nug nuka nuhig bauklel ele amubia Nug Beka da, da ele da daka dahil bauklel ele daakulnu medom. <sup>27</sup> Amu ele, da am Danab Bekalag amunu hetodiakpa da danab epediadkulnu gagatag ele medom.

<sup>28-29</sup> Anam amunu ag dab mak kudum aib aopig. Adinu? Haen laa udieb amu danab oh mauhpig, modpa niiteb ele amu, ag da baal doona, ag mauhak aben uuna, edun hipaidkulag. Am danab ag kobol ena hepig ele amu ag edun hipaidna, bauklel daaglag. Danab ag kobol ehed hepig ele amu edun hipaidna, ag hetodiakpa daaglag.

### *LAA AG JESUSNU MADIPIG*

<sup>30</sup> Am da daka dahil dab makpa keeke laa ii hetem. Iita, da Mama topanu nai aomi amupa da danab epediadtem amunu dahil epediak am ena. Adinu? Da daka dahil dab mak ii dim lamidtem. Iita. Laa Nug da meide udimi ele amu, Nug oo niite amuib da dim lamidtem.

<sup>31</sup> Am da dakanab dahilnu nai imu matilom amu dahil nai matiak imuam elele iita daalo <sup>32</sup> amge laa daate, amu Kayak, Nug dahilnu madite. Amu da dootem, Nug nai tutukuib madite. <sup>33</sup> Am anuka ag danab laala maateg Johanes topa ukaeg, nug dahilnu genab matie doopig <sup>34</sup> amge danab ag dahilnu maditeb amunu amu da dab mak okai ii aotem. Iita, amge ag Johannesnu nai dab mena, dahilnu oolagpa genab doopeg, Kayak Nug ag edua diikunu amu da amunu Johannesnu nai amu

matimi. <sup>35</sup> Johanes nug amu amahlak amahalte bia, nug amahlak ag matom. Mate, ag haen tutu amunu oolag ena daye, gamag ahak dooglagnu ena doopig. <sup>36</sup> Amge keeke laa ele Mame Nug da meide udimi amu ipuanadte. Keeke amuam Johannesnu nai edidte. Keeke amuam udat da hetem imu. Da Mamel Nug da amu hein malakulnu meide udien hetem. <sup>37</sup> Aria Mama Nug da meide udimi ele amu, Nug dahilnu matiom amge ag Nug ode nakok laa iinab doopig, ag Nug ele nakok laa ii anidpig. <sup>38</sup> Nug da meide udimi ele amu ag dahilnu oolagpa genab ii dooteb amunu nuhig nai ag oolagpa ii daate. <sup>39</sup> Ag Kayak nai yak niite, nai amu eb qena autna aona, 'Nai amu bau dayak megate,' ateb amge nai amuam dahilnu aaku ate <sup>40</sup> amunu, adinu ag da gumidna u dina, bauklel aoglagnu ii heteb? <sup>41</sup> Da danab ag da binal mekulagnu dab mak okai ii aotem <sup>42</sup> amge da ag tutuku doyardtem. Kayaknu oo mauhak kobol ahilagpa nakok laa ii daate amunu ag aka binalag aoglagnu dab mak okai aoteb. <sup>43</sup> Da Mama onigpa udimi amu ag dahilnu oolagpa genab ii dooteb. Amge danab laa nug nuka nug onigpa u dia, nai matieb amu ag nuhignu oolagpa genab dooglag. <sup>44</sup> Ag am lailkad dilagpa binalag okai aoglagnu heteb amge binalag laa, Kayak topanu udite ele amu, ag amu aoglagnu ii heteb amunu ag atem hena, oolagpa genab dooglag? <sup>45</sup> Da amu ag hetodiakpa naipa yaaladkulnu aib dab mepig. Danab nug ag hetodiakpa naipa yaaladku ele amu Moses. Danab amunu amu ag, 'Nug ig ehanigku,' aon ateb. <sup>46</sup> Ag Mosesnu nai oolagpa genab doolob

amu ag dahilnu ele oolagpa genab doolob. Adinu? Nug am dahilnu nai yom. <sup>47</sup> Amge ag nuhig nai yak amu oolagpa genab ii doonna amu a<sup>tem</sup> hena, ag dahil nainu oolagpa genab dooglag?” awa aum.

## 6

### *JESUS DANAB 5,000 E MATOM*

<sup>1-5</sup> Imu dimpa Juda dilag Pasowa metid hobul haen miag do, Jesus Nug le ameg Galelia, laa ag le amunu, “Le ameg Taiberias,” aon a<sup>teb</sup>, le amu hego laih gokunu le amu mata<sup>dom</sup>. Jesus Nug laih ugeke, danab kudumnab ag le ihi aidna, dim lamidna gopig. Adinu? Ag Nug eponak keeke, danab hekunu elele iita, ode danab bedulagpa heehe, ag ena daeegeg anidpig. Jesus Nug apa uka, qauko nakok laapa te, nuhikud ipunitak awak danab ele ag hedep nena daapig. Daanna amu Jesus Nug neeke uke, danab kudumnab ag gumidna udiegeg anat<sup>om</sup>. Amunu Nug Pilipus od met<sup>om</sup>. “Ig e elele adepanu imu oh matagnignu daden mekunig?” awa od met<sup>om</sup>. <sup>6</sup> Nug nai amu Pilipus oo anidkunu od met<sup>om</sup>, Nug nuka amu a<sup>tem</sup> hekunu amu matu doyom. <sup>7</sup> Nug anam od mete amu Pilipus odepa awa aum. “Danab oh ag bret hupu nakok nakok lakulagnu amu ig bret 1000 kina editak daden mekunig,” awa aum. <sup>8</sup> Nug anam a amu nuhig ipunitak awak danab laa Andreus, nug Simon Petrus ele a am eamag amu, nug aum. <sup>9</sup> “Nid laa iiku daate, nug am bali bret kunum tanig ele amu kakai adit ele. Amge amuam keeke nagnag, danab am huanak,” awa aum. <sup>10</sup> A amu Jesus amelagpa aum. “Danab imu oh hepeg, ag

hedep nena dayeg!” awa aum. Apa amu gikidah tepu ele dayom amunu danab oh ag hedep nena daapig. Danab amu ag 5,000 keeke anam. <sup>11</sup> Ag daaegeg, Jesus bret diia ada, Kayak amegpa, “Ena hen mekame,” awowa, bret pane ne, pania danab daapig amu oh anen anen matom. Nug kakai amu ele anamib heum amu danab oh ag e elele aopig. <sup>12</sup> Haen danab ag oh oolag ditia male, Jesus Nug nuhikud ipunitak awak danab amelagpa aum. “E big niite amu oh qag meig! Ig hupu nakok laa ii kakidmata,” awa aum. <sup>13</sup> Nug a amu ag e big qag mena amu kaleg tuelp inaeg am beum. Amuam bali bret tanig ele, danab laeg, oolag dite uupig amu inapig. <sup>14</sup> Danab ag Jesus kobol he anidpig ele amu ag apig. “Genab ig propet laa nug wan imupa udikunu nai amu doomut ele am iiku!” aon apig.

<sup>15</sup> Aria Jesus doynom, ag Nug adan hepeg, ahilag king daakunu hepig amunu Nug aha, qauko laapa nuka ukom.

<sup>16-17</sup> Aam no uu doowo, Jesusnu ipunitak awak danab ag le ameg ihipa nona, Nug ameg mena daapig amge gatatu neene, Jesus Nug gumata ii udiom amunu ag ubpa tena, le ameg matadna Kapenaum gokulagnu gopig. <sup>18</sup> Ukaegeg, ulah huanak dig meum amunu duban dig ma ahom. <sup>19</sup> Duban ahehe, ag ub el qena, nakok 4 o 5 kilomita anam ukaegeg, Jesus Nug le gadapa tapa, ag gukuata do anidna, ag huana badapig. <sup>20</sup> Amge Nug amelagpa aum. “Ag aib badapig, imu daib,” awa aum. <sup>21</sup> Nug anam a amu ag Nug aon, ubpa mekulagnu hepig. Heeg te, ub nug pahanab aben ag gokulagnu gopig ele amu guguitom.



### *DANAB AH JESUS MATIN GOPIG*

<sup>22</sup> Ded Jesus danab kudum e matom, ded amu uue, ded amupa danab ah kudum amuib ag le ihipa apa daapig. Daanna amu ag apig. “Tumai amu ub laa iita, laipu ipunitak awak danab tena gopig ele aakuib dayom amu Jesus Nug nuhikud ipunitak awak danab ele oh ii gopig, ag aka gopig.” Ag amu matinna daanna doopig. <sup>23</sup> Aria ag anam doonna daapig amu ub laala Taibiriasnu ag u<sub>di</sub>n, Nadi Nug unuqitowa, bret mate lapig abenpa eedpig. <sup>24</sup> Amunu danab ah ag Jesus, nuhikud ipunitak awak danab ele apa ii daapig doona, ag aka ubpa tena, Jesus matin Kapenaum gopig.

<sup>25</sup> Ag gona, Jesus laih dayeye anidna, od metan apig. “Ipunitak danab, Na haen adipa na ipa u<sub>di</sub>me?” aon apig. <sup>26</sup> Anam aeg amu Jesus odelagpa awa aum. “Da genabnab genab ag amelagpa atem. Ag eponak keeke laala, danab hekunu elele iita hemi amu, ag amu anidpig amge ag diig amunu da matidna ii udipig. Iita. Ag bret laeg, oolag ditiom amunuib udipig. <sup>27</sup> Ag e aon lapeg, bedulag gagatag qeeb, wan imupan udatib hekulag<sub>nu</sub> amu aib anuqak doopig. Iita. Ag Kayak nai aon dab menan, nuhig udat hekulag<sub>nu</sub> anuqak doyeg! Mama Kayak Nug da nai amu mada<sub>ku</sub>l<sub>nu</sub> gagatag medom amunu amu Danab Bekalag da, geha ag mada<sub>ku</sub>l. Ag nai amu aon, udat hepeg, udat amuam iita ii mema, hanhan daaku,” awa aum. <sup>28</sup> Nug anam a amu ag apig. “Ig atem heta, Kayak<sub>nu</sub> udat hekunig?” aon apig. <sup>29</sup> Aeg am Jesus odelagpa awa aum. “Kayak<sub>nu</sub> udat amu iiku. Kayak Nug laa me u<sub>di</sub>om amu ag nuhig<sub>nu</sub>

oolagpa genab dooglag. Laa uḍiom amuam da,” awa aum. <sup>30</sup>Jesus Nug anam aum amunu ag apig. “Na aḍi eponak keeke, danab heḱunu elele iṭa laa hepe amu ig anidta, oonigpa genab doognig? <sup>31</sup>Ig mamenḱad ag atu taḍakpa bret laa onig mana lapig amu Kayak naipa, nai amunu laa daaṭe. Nai amuam inam. ‘Nug hab aṭannu bret maṭe lapig.’ Nai anam daaṭe amu na amubia heḱut-te?” aon apig. <sup>32</sup>Aeg amu Jesus Nug amelagpa aum. “Da genabnab genab ag amelagpa aṭem. Moses nug hab aṭannu bret genab ii maṭom amge da Mamel, Nug amu hab aṭannu bret genab ag madaṭe. <sup>33</sup>Bret Kayak madaṭe ele, amuam danab laa hab aṭannu neum. Bret amu Nug wanpanu danab ah bau hanhan dayak madaṭe,” awa aum <sup>34</sup>Jesus anam a amu ag apig. “Nadi, bret amuam na haen oh meḱe,” aon apig. <sup>35</sup>Aon aeg amu Jesus Nug aum. “Bau hanhan dayaknu bret am da. Danab nug dahilpa doṭe amu nug enug laa ii qema. Am danab nug dahilnu oopa genab doṭe amu nug le baag laa ii diima. <sup>36</sup>Amge da tatam ag amelagpa ami amubia. ‘Ag da anidṭig amge ag oolagpa genab ii dooṭeb.’ <sup>37</sup>Amu danab ah aun Mame Nug da meḱate ele amu, ag oh dahilpa doḱulag am aun nug dahilpa doṭe amu da nug ii gedidpa. <sup>38</sup>Aḍinu? Da hab aṭannu wanpa uḍimi amu da dahil maitak o dahil dab mak diṃ lamidḱulnu ii uḍimi. Iṭa. Da am laa, Nug da meide uḍimi ele amu, Nug ode dim lamidḱulnu uḍimi. <sup>39</sup>Aria laa Nug da meide uḍimi amu, Nug oo niṭe ele amu inam. Danab ah oh da meḱom ele amu, ag ohnab dahilib daaglag. Laa ii qetodma. Wan haen malakpa da ohnab mad

adapi, ag edun hipaidk<sub>u</sub>lag. <sup>40</sup> Ao, da Mamel Nug oo niite ele amu anam aak<sub>u</sub>. Danab aun ag Nug Beka da, ag da anidna, ag oolagpa genab dooteb ele amu, ag bau dayak hanhannu aoglag. Da daka geha wan haen malakpa mad adak<sub>u</sub>l,” awa aum.

<sup>41</sup> Jesus Nug matu, “Da am hab at<sub>annu</sub> bret wanpa ud<sub>imi</sub>,” awa aum amunu Juda ag nuhignu oolagpa elele ii daye, aka aka nai kud<sub>um</sub> madipig. <sup>42</sup> Ag inam mat<sub>inna</sub> apig. “Danab umu Nug am Jesus, Josep beka. Nug anig mameg ele amu ig iite doot<sub>em</sub>? A<sub>tem</sub> he Nug, ‘Da hab at<sub>annu</sub> ud<sub>imi</sub>,’ awa ate?” aon apig. <sup>43</sup> Ag anam mat<sub>iegeg</sub> amu Jesus Nug amelagpa aum. “Ag aka aka anam aib madipig. <sup>44</sup> Am laa nug nuk<sub>a</sub> dahilpa dok<sub>unu</sub> elele iita, Mame, Nug da meide ud<sub>imi</sub> ele amu, Nug ehaniteb, aak<sub>uib</sub> am nug dahilpa dok<sub>u</sub>. Dok<sub>u</sub> amu da nug wan haen malakpa mad edak<sub>u</sub>l. <sup>45</sup> Propet dilag yakpa, nai inam niite. ‘Danab ah oh am Kayak nuk<sub>a</sub> nuhig kobol ipuanad<sub>ku</sub>.’ Aria Nug ag ehanata ipuanate, ag Mame ode doona, nuhig kobol aona amu ag dahilpa do<sub>teb</sub>. <sup>46</sup> Da danab laa Kayak ant<sub>om</sub> ii a<sub>tem</sub>. Iita, danab ah wanpanu laipu laa nug amegpa Kayak ii ant<sub>om</sub>. Iita. Laa nug Kayak topanu u<sub>diom</sub> ele amu Nug aak<sub>uib</sub> Kayak ant<sub>om</sub>. <sup>47</sup> Genabnab genab da ag amelagpa a<sub>tem</sub>, aun nug dahilnu oopa genab doote ele amu, nug bau hanhan dayak ele awom daate. <sup>48</sup> Da aak<sub>uib</sub> am bau dayaknu bret. <sup>49</sup> Ag mamelkad am atu tadakpa e onig mana lapig ele amu ag mauhpig. <sup>50</sup> Amge bret hab at<sub>annu</sub> neum amu daib amu, laa nug bret imu lak<sub>u</sub> amu nug ii mauhma, bau daaku. <sup>51</sup> Da amu hanhan dayaknu bret hab at<sub>annu</sub> ud<sub>imi</sub>.

Am laa nug bret imu lanana amu nug bau hanhan daaku. Amu ele bret da danab ah oh madaku ele imu am, da bedul,” awa aum.

<sup>52</sup> Jesus Nug anam a amu Juda laala ag aka aka nai matin, “Atemnab danab imu Nug tepu ig mekeb lakunig?” aon apig. <sup>53</sup> Anam aeg amu Jesus amelagpa aum. “Genabnab genab da ag amelagpa atem. Ag Danab Bekalag da, da tepul tiil ele ii lakulag amu ag bau ii daamna. <sup>54</sup> Am laa nug da tepul tiil ele laku amu nug bau dayak hanhannu ele, am wan haen malakpa da nug mad edapi, nug edua hipaidku. <sup>55</sup> Adinu? Da tepul tiil ele amu lanaknu e genab. <sup>56</sup> Aun nug da tepul tiil ele late amu, nug dahilpa date amu da ele nuhigpa datem. <sup>57</sup> Mame, Nug bauklel date ele, Nug da meide udimi amu, da nuhigpa bau datem amubia aun nug da laide amu, nug dahilpa bau date. <sup>58</sup> Bret imu amu ag mamelkad bret lawona mauhpig amubia iita. Bret imu amu hab atannu neum, am aun nug bret imu late amu nug haen oh bau daaku,” awa aum. <sup>59</sup> Jesus Nug Kapenaumnu nai doyak laka apa danab ah ipuanatata, nai amu matiom.

### *JESUS AM BAUKLELNU NAI MATIOM*

<sup>60</sup> Aria nuhig ipunitak awak danab kudum ag nai matiom amu doona amu ag apig. “Nai umuam ug elenab, aun nug dookunu elele?” aon apig. <sup>61</sup> Ag anam apig amge Jesus Nug ipunitak awak danab, ag aka aka nuhig nai matiak amunu ag oolagpa elele ii daye, nai kudum madipig amu Nug nuka oopa matunab doyom amunu Nug ag amelagpa aum. “Ag nai amu aoglagnu elele iite dooteb? <sup>62</sup> Anam dayeb amu Danab Bekalag da,

da anuka daadmi, aben amupa eduen tebipi am ag atem dooglag? <sup>63</sup> Ag doyeg! Kayak Oudi nuka, Nug danab bauklel medate, danabnu gagatag nug ig ehanigkunu elele iita. Am nai da ag matami imu nug Oudi amu nug bauklel ele. <sup>64</sup> Anam daate amge ag oolagpa laala ag oolagpa genab ii dooteb,” awa aum. Jesus Nug dig makpan aun adi ag oolagpa genab ii doopig amu danab aun nug Jesus keked epelagpa meku amu Nug amu oh doyom. <sup>65</sup> Jesus Nug anam anana, Nug nai tudita matiaya aum. “Diig amunu da ag amelagpa ami. Laa nug nuka nuhig dab makpa amu da gumida ii doma. Iita. Mame Nug laa ehanite amu, nug aakuib da gumida dote,” awa aum.

<sup>66</sup> Jesus Nug nai amu matiom, haen amupa amu nuhig ipunitak awak danab laala ag Nug di medapig, baula Nug dim ii lamidpig. <sup>67</sup> Jesus anam anta amu nuhig ipunitak awak danab tuelp amu ag amelagpa aum. “Ag ele da uuidna gokulagnu oolag daatete?” awa aum. <sup>68</sup> Jesus anam a amu Simon Petrus nug aum. “Nadi, ig aun topa gokunig? Nai nahip amu bauklel ele, haen oh daate. <sup>69</sup> Ig na dooidta, oonigpa genab ele dootem, na aakuib am Kayak Beka opia awak ele,” awa aum. <sup>70</sup> A amu Jesus Nug nuhikud ipunitak awak danab amelagpa aum. “Da ag danab tuelp epediadmi amge laipu laa ag oolagpanu amu nug oudi nau,” awa aum. <sup>71</sup> Jesus Nug Simon Iskariot beka Judasnu aum. Ipunitak awak danab tuelp amu oolagpanu, nug laa aku amge dimpa nug Jesus qepeg mauhkunu keked epelagpa meum.

## 7

*NUG AMAKUD AG JESUSNU OOLAGPA GENAB II DOOPIG*

<sup>1</sup> Keeke amu oh dimpa Jesus Nug laih Galelia apa uka oiyom. Juda wanpanu Juda danab ag Nug qepeg mauhkunu hepig amunu Nug Juda wanpa oikunu uua, aha uka, Galelia apa oiyom. <sup>2</sup> Aria Juda ag memetalkad ag Igipta wan uun oipig amu ag amu peh hena, apa metid laipu bia daanna dab mekulagnu, ag Kayak ele binag mekulagnu hobul laa hedapig amu hobul amunu haen guguite, <sup>3</sup> Jesus amakud ag Nug amegpa apig. Na aben imu uuna, Juda wanpa uke! Gope, nahipad ipunitak awak danab ag nahip udat, na hetem ele amu, hepe anidkulag. <sup>4</sup> Danab laa nug danab laa oh nuhig udat anidkulagnu oo daate ele amu, nug lokuma ii hete. Amunu na eponak keeke, danab hekunu elele iita hetem amu na danab ah oh noolagpa hipaidna daana he!” aon apig. <sup>5</sup> Adinu? Jesus amakud ag ele nuhignu oolagpa genab ii doopig amunu ag nuhignu anam madipig.

<sup>6</sup> Jesus amakud ag anam matieg am Jesus Nug ag amelagpa aum. “Gemu da gokulnu haennab iita, haen imu oh am ahilagib. <sup>7</sup> Wanpanu danab ah ag oolagpa ahilagnu nau, ninig ele dooglagnu elele iita amge dahilnu ag anam dooteb. Adinu? Da haen oh kobol nau, tutuku iita, ag heteb ele amu, da amunu maditem. <sup>8</sup> Amu ag am hobulpa ukeg! Da geha imu ii gopa. Da dahil haenpa gokul,” awa aum. <sup>9</sup> Jesus Nug amakud amelagpa anam anana, Galelia apa dayom.

*JESUS JUDA DILAG PEHNU METID HOBUL ANIDKUNU UKOM.*

<sup>10</sup> Aria Jesus amakud ag Juda dilag hobul amu anidkulagnu ukaeg, dimpa Jesus Nug ele ukom amge Nug miag atiak ii ukom. Lokuma ukom. <sup>11</sup> Amu Juda ag hobulpa tepig amu ag Nug matinna, ii anidna apig. “Danab amuam adepa daate?” aon apig. <sup>12</sup> Danab ah ag ele Jesusnu nai kudum madipig. Laa am apig. “Nug am danab ena,” amge laa apig. “Nug am danab nau, nug danab ah kudum ham bupualadte,” aon apig. <sup>13</sup> Anam madipig amge ag Juda okai dilag badapig amunu laipu laa nug ag noolagpa nai miag atiak laa ii matiom. <sup>14</sup> Ag anam matiegeg, Jesus Nug metid hobul gamagpanab mana metak laka noa, danab ah amelagpa nai ipuanatom. <sup>15</sup> Nug anam nai matieye amu ag dab mak kudum aonna, aka aka nug od metan apig. “Danab imuam Nug sul laa ii heum amu Nug atem ha, doyak okainab awom?” aon apig. <sup>16</sup> Ag anam matiegeg amu Jesus Nug ag amelagpa aum. “Da nai ag amelagpa maditem ele imuam dahil iita. Kayak, Nug da meide udimi ele amu, da nuhig nai maditem. <sup>17</sup> Am danab laipu laa nug Kayak nai dim lamidku amu nug nai, da maditem imu, nai amuam Kayak topanu beum o iita da dahil dab makpatai maditem amu nug dooku. <sup>18</sup> Am danab laa nug nuka nuhig dab makpa nai madite amu nug am nuka onig okai aokun hete. Amge danab laa, nug laa me udiom ele amu, nug onig humate amu danab amu nug tutukunab, nug nuhigpa ehed laa ii daate. <sup>19</sup> Anuka Moses nug ag do matom amge ag oolagpa laipu laa

nug do amu tutukunab dim ii lamidte amunu adinu da ipeg mauhkunlu heteb?” awa aum.

<sup>20</sup> Nug anam a amu danab ah ag apig. “Oudi nau laa na bedunpa daate. Aun nug na nitebeb mauhkutnu hete?” aon apig. <sup>21</sup> Aeg am Jesus Nug aum. “Da Metidpa danab babaitak udat hemi amunu ag otaina dab mak kudum aoteb. <sup>22</sup> Ag alalkad ag dig mena Kayak ode dim lamidna, gada otadak heegeg udie, Moses nug do naipa meum daate. Amunu ag ele Metidpa udat henana, nid naunau gadalkad otadteb. <sup>23</sup> Ag Mosesnu do amu tipalmananu, ag Metidpa udat hemananu do, ag do amu tipalna, Metidpa udat henan, nid naunau gadalag otadteb. Aria, ag anam heteb amunu da danab laa Metidpa bedu babaiti, amu ag amunu adinu dahilnu opodilag beum? <sup>24</sup> Ag amelagpaib keeke aib epedipig. Dab mak tutuku aona, kobol tutukupa, dahil udat imu epedin anteg!” awa aum.

### *LAA AG, “DANAB IMU AM KRISTUSTAI,” APIG*

<sup>25</sup> Jesus Nug anam a amu Jerusalem danab laala, ag Juda okai ag Jesus qepeg mauhkunu dab mepig amu ag amu doona, ag apig. “Danab imuam ag qepeg mauhkunu apig <sup>26</sup> amge Nug geha iiku nai oh miag atiakib madite amu ag nuhignu nai laa ii maditeb. Iki danab ag ele Nug am Kristus oolagpa genab doopigtai? <sup>27</sup> Amge ig Nug apag diig am doot malamut. Kristus udiiku am danab laipu laa nug Kristus apag diig dookunu iita,” aon apig.

<sup>28</sup> Danab ah ag anam matiegeg, Jesus Nug mana metak laka danab ah noolagpa hibaita dayaya, baag okaipa nai matiaya aum. “Ag da dooidteb, da



apal diig ele dooteb amge da daka dahil dab makpa ii udimi. Mame Nug da meide udimi. Nuhig dig am genabib amge ag Nug ii dooteb. <sup>29</sup> Da Nug dootem. Da Nug ele daada, Nug da meide udimi,” awa aum.

<sup>30</sup> Jesus Nug anam a, ag Nug adaglagnu hepig amge nuhig haen ii malom amunu laipu laa nug Jesus ii adom. <sup>31</sup> Laala ag adaglagnu hepig amge danab ah kudum nuhignu oolagpa genab doona, ag apig. “Danab imu Nug eponak keeke, danab hekunu elele iita kudum hete amu haen Kristus Nug udiku amu Nug eponak keeke, danab hekunu elele iita kudumnab, danab imu editak hekute? Iita,” aon apig.

<sup>32</sup> Danab ah ag matiegeg, mana metak danab okai amu do gumak danab-Parasia ele ag danab ah nai kudum matiegeg doona, ag ahilag daup laa Jesus adaglagnu maateg udipig. <sup>33</sup> Udieg am Jesus Nug aum. “Da haen tutuib ag ele dayota, da eduen, laa Nug da meide udimi ele amu, nuhigpa gokul. <sup>34</sup> Gopi, ag da anidkulagnu hekulag amge da ii anidmana. Amu ele aben da gotem ele, amupa ag gokulagnu elele iita,” awa aum. <sup>35</sup> Anam a amu Juda ag aka aka nai matinna apig. “Nug adepa ukeb, ig Nug ii anidmata? Nug Juda laala Grik wanpa daateb, ahilagpa uka Grik danab ipuanadkutai. <sup>36</sup> Nug, ‘Ag da matidkulag amge da ii anidmana,’ amu ele, ‘Da uke daakulpa amu ele ag gokulagnu elele iita’ awa aum, am Nug adepanab gokunu aum? Nai amuam diig adekunab?” aon apig.

### *LE BAUKLEL ELE*

<sup>37</sup> Metid hobul amu malaknu ded beum, ded amuam hobul amunu nadinab amu, haen amupa

Jesus Nug hibaita, baag okaipa ewa aum. “Danab laa nug le baag diieb amu nug da gumida u<sub>d</sub>ia, le lanad! <sup>38</sup> Laa nug dahilnu oopa genab doote amu, Kayak naipa yak laa daate amubia. ‘Nug oopan<sub>u</sub> bau hanhan dayaknu le, nug ba ugaka daaku. Iita ii mema.’ <sup>39</sup> Jesus Nug nai amuam Kayak Oudinu aum. Danab ag oolagpa genab doona amu ag aoglag. Amge haen amupa Jesus Nug Mame topa ii ukom amunu Kayak Oudi, Nug danab oolagpa ii dayom.

#### *DANAB AH OPATNA ADIT DAAPIG*

<sup>40</sup> Danab ah laala ag nai amu doona, “Genabnab danab imu am propet,” aon apig. <sup>41</sup> Laala ag apig. “Nug am Kristus,” amge laala ag apig. “Kristus Nug Galelia apate beku? <sup>42</sup> Kayak naipa yak laa daate. Nai amuam inam. ‘Kristus nug Dawit budubpa Betlehem, anuka amuam Dawit apag diig amu, apa beku,’ ” aon apig. <sup>43</sup> Danab ah ag anam matinna, ag otin, ameg adit daapig. <sup>44</sup> Daana, laala ag Jesus adaglagnu hepig amge laipu laa nug epeg bahia, Jesus ii adom.

#### *IKI DANAB AG JESUSNU OOLAGPA GENAB II DOOPIG*

<sup>45</sup> Anam heeg am daup ag edun, mana metak danab okai am do gumak danab-Parasia ele gumadna ukaeg amu ag apig. “Atem hena, ag Nug adan ii aon udipig?” aon apig. <sup>46</sup> Anam aeg am daup amu ag apig. “Danab laa nug danab imu nai madite bia laa matie ii anidmut,” aon apig. <sup>47</sup> Daup ag anam aeg amu do gumak danab-Parasia ag apig. “Jesus Nug ag elete ham bupualatom? <sup>48</sup> Ig iki danab, ig oonigpanu o iita

do gumak danab-Parasia ag oolagpanu laipu laa Jesusnu oopa genab dootete? Iitanab. <sup>49</sup> Amge danab ah amu ag do ii dooteb, ag nob nau aoglagnu daateb, ag nuhignu oolagpa genab dooteb,” aon apig. <sup>50</sup> Anam matiegeg amu ag oolagpanu laipu laa, nug onig Nikodemus, nug anuka Jesus gumita ukom ele amu, nug od matom. <sup>51</sup> “Ig ihinig dopa danab laa hetodiakpa ii dayom haenpa, nug ehed heumnu akunignu am elelete? Iitanab. Nug keeke heum amu ig tatam doota amu ig nug epedignig,” awa aum. <sup>52</sup> Nug anam a amu ag nuhig nai inam nob mepig. “Na ele am Galelia ted amunu na doyak iitatai? Na nai atog nona eb qena am tutuku anidna dookut. Propet laipu laa nug Galelia apanu iinab bema,” aon apig. <sup>53</sup> [Anam daye amu danab oh aben aben ukadpig.

## 8

<sup>1</sup> Danab ah ag aben aben ukadpig amge Jesus Nug amu olipnu qaukopa ukom.

### *AH LAA GAPAI HEUM*

<sup>2</sup> Uke wakade butuanab Jesus edua udia, mana metak lag oopa no, danab ah kudum nug gumidna udieg, Nug hedep na dayaya, nai ipuanatom. <sup>3</sup> Nug anam ipunitak nai madete, Juda dilag do mehuqak danab amu do gumak danab-Parasia ele ag ah laa gapai kobol heehe anidna, aon dona, danab ah kudum noolagpa meeg, hibaita dayom. <sup>4</sup> Anam dayeye ag Jesus amegpa apig. “Ipunitak danab, ah imu nug gapai kobol he anidmut. <sup>5</sup> Mosesnu do nug ig ah imubia menpa makudkunignu ipunigte. Am na adi atem?” <sup>6</sup> Ag nai amupa Jesus nai ehed

laa ab amu ag Nug adan aon, hetodiakpa mena, nai bedupa yaaglagnu ib madipig. Ag anam apig amge Jesus Nug gomela, epeg hiqalpa dig ma, wanpa yaaya dayom. <sup>7</sup> Anam dayom amge ag edunna, od metak baubau hepig. Anam heeg amu Nug edua tutuku dayaya, ag neekatata aum. “Ag oolagpa aun laa nug hipunin iita daate amu nug tatam menpa ah imu makudad!” awa aum. <sup>8</sup> Jesus Nug anam awowa, Nug baula gomela, epeg hiqalpa edua wanpa yaaya dayom.

<sup>9</sup> Aria danab amu ag nai anam doona, ag ohnab laipu laipu lag oopanu dimitim gona malapig. Kaino ag tatam anuqna dimitim waegeg, laala dim gopig. Ukaeg Jesus Nugib dayeye am ah, nuhignu apig ele amu, nug ele Jesus noobpa hibaita dayom. <sup>10</sup> Nug anam dayeye, Jesus edua hibaita od metom. “Ah, ag adepa gopig? Laipu laa na hetodiakpa iite meitom?” awa aum. <sup>11</sup> Anam a amu ah nug aum. “Nadi, laipu laa anam ii heum,” awa aum. A amu Jesus aum. “Da ele na hetodiakpa ii meidpa, na gona hipunin baula aib heme,” awa aum.]

### *JESUS AM WANPANU AMAHLAK*

<sup>12</sup> Aria Jesus haen laapa baula danab ah amelagpa nai matiaya aum. “Da am wannu amahlak. Aun laa nug da dim lamidku amu nug gatatupa ii oima. Iita, nug bauklelnu amahlak ele daaku.”

<sup>13</sup> Jesus anam matie amu do gumak danab-Parasia ag apig. “Na naka nahipnu nai mehuqtem amunu nai nahip am ham bupuak,” aon apig. <sup>14</sup> Aon aeg am Jesus Nug aum. “Am genab, da dahil nai maditem amge dahilnu nai amu genab. Adinu? Da adepanu udimi amu da dootem, amu da edue

gokulnu amu da ele dootem. Amge ag da adepanu udimi amu adepa edue gokul amu ag ii dooteb. <sup>15</sup> Ag amu wannu kobolpa danabnu hak epediteb. Da am epediak udat laa ii hetem. <sup>16</sup> Amge da danab laa epedidlom amu da tutukunab epedidlom. Adinu? Da daka ii hetem, Mame, Nug da meide udimi ele amu, Nug da ele oh daatep. <sup>17</sup> Ahilag dopa amu nai inam yak daate. ‘Danab adit a nai diig laipu atep amu, nai ahilah am genab’. Yak anam niite. <sup>18</sup> Da daka da dahilnu nai maditem, Mame, Nug da meide udimi ele amu, Nug ele dahilnu nai madite,” awa aum. <sup>19</sup> Anam a amu ag Nug od medapig. “Na Mamen amu adepa daate,” aon apig. Aon aeg amu Jesus Nug aum. “Ag am da ii dooidteb, da Mamel ele ag ii dooteb. Ag da dooidnalob amu da Mamel ele doolob,” awa aum. <sup>20</sup> Nug nai amuam mana metak lag oopa, men dodonu kunup guguitak dayaya ipuanatom amge Nug mauhkunu haen ii malom amunu laa Jesus adakun ii heum.

<sup>21</sup> Amu Jesus baula ag amelagpa aum. “Da gokulnu hetem amu ag da geha matidkulag amge ag da ii anidmana, hipunin ahilag amu ag tonateb, mauhkulag. Aben da gokulpa ag apa gokulag nu elele iita,” awa aum. <sup>22</sup> Nug anam a amu Juda ag aka aka nug od metan apig. “Nug nuka Nug bedu qa mauhkute? Diig amunu Nug, ‘Ag da gokulpa amu ag gokulag nu elele iita,’ atete?” aon apig. <sup>23</sup> Aon aeg am Jesus Nug nai tudita aum. “Ag am honapnu, da amu atannu. Ag am wan imupanu, da amu wan imupanu iita. <sup>24</sup> Amunu da ag amelagpa tatam ami. ‘Ag hipunin ahilag amu ag tonateb mauhkulag.’ Am genab, ag da

am Kayak ag amu oolagpa genab ii dooglag amu ahilag hipunin genab tonateb mauhkulag,” awa aum. <sup>25</sup> Jesus anam a amu ag Nug od medapig. “Na am aun?” apig. Aeg am Jesus Nug aum. “Da tatam ai doopig ele, da am anamnab aakuib. <sup>26</sup> Da ag amelagpa nai kudum madikulnu elele, da hetodiak danab, Nug danab hetodiakpa epedite, amubia da ag epediadkulnu elele amge laa Nug da meide uđimi ele, Nug am genabnu diig, da nuhigpa nai oh aomi amu da wanpanu danab amelagpa amuib maditem,” awa aum. <sup>27</sup> Nug anam aum amge ag Jesus Nug Mameg Kayaknu aum amu ag oolag ii maitom. <sup>28</sup> Amunu Jesus Nug ag amelagpa aum. “Dimpa ag Danab Bekalag da ad emaitakpa atulidona amu ag da am danab aun amu dooidkulag. Amu ele, da dahil dab makpaib keeke ii hetem. Iita. Mame Nug da ipunidom amu da amunu maditem amu ele dooglag. <sup>29</sup> Am aun Nug da meide uđimi ele, Nug da uuide, daka ii daatem. Adinu? Da haen oh keeke Nug oo niite ele amu, da amu hetem,” awa aum. <sup>30</sup> Jesus anam a amu danab ah kudum ag nuhignu oolagpa genab doopig.

### *“IG AM ABRAHAM BEKOD,” APIG*

<sup>31</sup> Juda danab ag Jesusnu oolagpa genab doopig ele amu, Nug ag amelagpa aum. “Ag ipunitak nai dahil dim lamidteb dayeb amu ag am genab ipunitak awak danab dahiladnab daaglag. <sup>32</sup> Ag geha nai genab dooglag amu nai genab amu heeb, ag uhugak enapa daaglag,” awa aum. <sup>33</sup> Jesus anam a amu laala nuhignu oolagpa genab ii doopig amu ag apig. “Ig am Abraham bekod, am ig haen laa wanpanu danab waapa laa ii

daamut. Am a<sub>tem</sub> hena, na ig uhuqak ena aog-nignu a<sub>tem</sub>?” aon apig. <sup>34</sup> Anam aeg am Jesus Nug aum. “Da genabnab genab ag amelagpa a<sub>tem</sub>. Aun laa nug hipunin hete amu nug am hipuninnu begbeg daate. <sup>35</sup> Laa nug danab okainu begbeg danab daate ele amu nug okai amu nuhig nidnab ii daate, haen oh nug laugpa ii daate amge danab okai beka, nug amu nug mameg ele haen oh daatep. <sup>36</sup> Amunu Danab Bekalag da, da ag uhuqak madapi, ag genab uhuqak enapa daaglag. <sup>37</sup> Da dootem, ag Abraham budupud amge nai dahil amu ahilagpa ii daate amunu ag da iupeg mauhkulnu heteb. <sup>38</sup> Da nai imu maditem ele amu, da Mame ele daadda doyen anidmi amu maditem amge ag am ag mamelagnu kobol heteb,” awa aum. <sup>39</sup> Nug anam a amu ag apig. “Ig mamenig am Abraham,” aon apig. Aeg amu Jesus amelagpa aum. “Ag genab Abraham budupudlob, ag nug kobol heum bia helob. <sup>40</sup> Da nai genab oh Mame topanu aomi amu mati<sub>yi</sub> doopig amge ag da nidaglag heteb. Abraham nug anam ii heum. <sup>41</sup> Ag am ag mamelagnu kobol heteb,” awa aum. Jesus anam a amu ag apig. “Ig aninig nug ib imuagpa danab kudum ele oiyona ii menuikom. Ig mamenig laipu, Kayak aakuib,” aon apig.

<sup>42</sup> Aeg am Jesus amelagpa aum. “Ag mamelag genab Kayaklob, ag dahilnu oolag mauhlo. Adinu? Da Kayak ele daada u<sub>dimi</sub>. Da dahil maitakpa ii u<sub>dimi</sub>. Iita. Kayak Nug da meide u<sub>dimi</sub>. <sup>43</sup> Am adinu ag dahil nai tutuku dab ii medateb? Amu diig am ag dahil nai ii dooteb. <sup>44</sup> Ag mamelag am Satan, ag nug bekod daateb amunu ag mamelag oo niite amu

ag dim lamidk<sub>u</sub>lag<sub>nu</sub> wagai meteb. Nug anuk<sub>anu</sub> danab aqe mauhteb. Ag mamelag nug kobol genab ii dim lamidte. Adinu? Kobol genab amu nuhigpa ii daate. Nug ham bupuak nai matiaya amu nug nuhig diig aakuib dim lamidte. Adinu? Nug nai ham bupuak madite, nug nai ham bupuak mamegnab daate. <sup>45</sup> Ag Satan bekod daateb amunu da nai genab maditem amu ag dahil nai ag oolagpa genab ii dooteb. <sup>46</sup> Da hipunin laa ii hemi. Danab laa nug dahilnu, ‘Nug hipunin heum,’ akunu elele iita amunu da nai genab maditem imu amu adinu ag oolagpa genab ii dooteb? <sup>47</sup> Laa ag Kayak bekod daateb ele amu, ag Kayak ode dim lamidteb. Ag amu Kayak bekod ii daateb amunu ag nai ii dooteb,” awa aum.

<sup>48</sup> Awa a amu Juda danab ag Jesus odepa aon apig. “Ig nahipnu genab atem. Na Samaria ted, ootpa hahail ele,” aon apig. <sup>49</sup> Aeg am Jesus odelagpa awa aum. “Da oolpa hahail iita, da amu, da Mamel binag humatem amge ag da binal qeeg nete. <sup>50</sup> Da daka da binal ele daakulnu ii hetem. Iita! Laa, amuam Kayak, Nug da bināl humate. Nug da hetodila, ehed laa ii anidte. <sup>51</sup> Da genabnab genab ag amelagpa atem, laa nug dahil ipunitak nai awa dim lamidku amu nug iinab mauhma,” awa aum. <sup>52</sup> Awa a amu ag nug amegpa apig. “Gemu ig genab dootem, na ootpa hahail ele! Abraham nug mauhom amu propet ele mauhpig, amge na atem, ‘Laa nug nahip nai dim lamiita amu nug am iinab mauhma.’ <sup>53</sup> Na nahipnu adi dootem? Na ig mamenig Abraham editakte? Nug amu propet laa oh ele ag oh mauhpig amge danab ag na dim lamidteb ele, ag ii mauhmananu atem. Na naka



nahipnu adinab dootem?” aon apig. <sup>54</sup> Aon aeg amu Jesus odelagpa awa aum. “Da daka da binal ele daakulnu hepi amu da binal am hamu. Amge da Mamel, ag nuhignu, ‘Nug am ihinig Kayak,’ odelagib ateb amu, Nug da binal ele daakulnu hete. <sup>55</sup> Ag Nug ii dooteb amge da amu Nug dootem. Da nuhignu, ‘Da Nug ii dootem, alom amu da ag bia ham bupuak danab daalom amge da Nug dootem amunu nuhig nai ele dim lamidtem. <sup>56</sup> Ag mame-lag Abraham nug dahil udiak haen anidkunu oo gamag ahehe, ameg ma dayom. Nug anta, nug oo gamag ahom,” awa aum. <sup>57</sup> Awa a amu ag Nug amegpa apig. “Na mad nahip 50 iita dayeye, na Abraham anidmenu atem. Na ham bubutem,” aon apig. <sup>58</sup> Anam aeg, Jesus ag odelagpa awa aum. “Da genabnab genab ag amelagpa atem. Abraham ii dayom haempa da daami, gemu daatem, buti adi daakul,” awa aum. <sup>59</sup> Nug anam aum amunu ag Nug makudkulagnu men agapig amge Jesus Nug danab kudum oolagpa bedu lokumitata, mana metak lag oopanu aha wana, dimitim ukom.

## 9

### *JESUS DANAB AMEG GAĐUAK EHANITOM*

<sup>1</sup> Jesus Nug dimitim uka, Nug wana, ib man ugaka, danab ameg gaduak ele antom. Nug anig oopanu ameg gaduak ele anam doum. <sup>2</sup> Jesusnu ipunitak awak danab ag amu anidna apig. “Ipunitak danab, aun nug hipunin he, anig nug danab amu ameg gaduak ele menuom. Nug hipunin heumte, o iita anig mameg eletai hipunin hepid?” aon apig. <sup>3</sup> Anam aeg amu Jesus amelagpa

aum. “Danab amu nuhig hipuninpa o anig mameg ele dilah hipuninpa ameg gaduak ii awom amge kobol amu beum amunu Kayaknu udat amu danab amupa miag atia beku. <sup>4</sup> Amahlak aaku daate amunu ig laa, Nug da meide udimi ele amu, nuhig udat hekunig. Gatatu nekunu haen aaku malate, gatatu neeb amu aun laa nug udat ii hema. <sup>5</sup> Da wan imupa dayeye, da amahlak madatem,” awa aum. <sup>6</sup> Jesus anam anana, Nug hunue, wanpa no, wan ele kabolia awa, danab amegpa qata qeum. <sup>7</sup> Qata qewowa, danab amegpa aum. “Na gona, Siloam le amegpa amen ihe!” awa aum. Siloam diig amu meeg ukom. Amunu nug uka, le layowa, ena daya, neeka, nug edua udiom.

<sup>8</sup> Aria, nuhig lag od laipu amu laikud ab laipu amu laa ag nug anuka dayaya, men dodonu unuqtom ele amu anidna apig. “Nug am anuka danab laa nug keekenu danab unuqadtom ele amutai?” aon apig. <sup>9</sup> Laa ag apig. “Nug aakuib,” aon apig. Aeg am laa apig. “Iita, nug danab ameg gaduak ele amubia,” aon apig. Amge nug nuka amu, “Da iikuib,” awa aum. <sup>10</sup> Nug anam a amu ag nug od medapig. “Na amen atemnab ha, ena dayom?” aon apig. <sup>11</sup> Aeg am nug ag amelagpa aum. “Danab laa onig Jesus ateb amu Nug wan wadu ele kabolia, amelpa mewowa, Nug da amelpa aum. ‘Na gona, Siloam le amegpa amen ihe!’ awa aum. Amunu da uke, amel ihai amu amel ena daye, da iiku neegtem,” awa aum. <sup>12</sup> Nug anam a amu ag nug od medapig. “Danab amuam adepa daate?” aon apig. Aeg amu nug aum. “Da ii dootem,” awa aum.

<sup>13</sup> Nug anam a amu ag nug omalna, do gu-

mak danab-Parasia, ag gumadna gopig. <sup>14</sup> Haen amuam Juda dilag metid ded dayeye, Jesus wan wadu ele kabolia, danab amu ameg babaitom. <sup>15</sup> Anam amunu do gumak danab-Parasia ag edun od medapig. “Na amen amu atemnab ha, ena dayom,” aon apig. Aeg amu nug ag amelagpa aum. “Nug wan lekoh amelpa me, da amel ihai amu da amel ena dayom,” awa aum. <sup>16</sup> Danab nug anam a amu do gumak danab-Parasia laa ag Jesusnu apig. “Danab amuam Kayak topanu ii udiom. Adinu? Nug ihinig Metidnu do ii dim lamidte,” aon apig amge laa ag apig. “Atemun ha, danab hipunin ele Nug eponak keeke danab hekunu elele iita amubia anam heku?” aon apig. Ag anam anana, opatna ameg adit daapig. <sup>17</sup> Ag anam hena amu ag edun, danab anuka ameg gaduom ele amu od medapig. “Danab amu Nug na amen babaitom amunu na nuhignu adi atem?” aon apig. Anam aeg am nug aum. “Nug am Propet,” awa aum. <sup>18</sup> Nug anam aum amge Juda okai ag nug anuka ameg gaduom, gemu nug ameg ena daate amu ag amunu oolagpa genab ii doona, danab amu anig mameg ele onilahpa eeg udieh, <sup>19</sup> od matan apig. “Imu a bekalahte? A nuhignu nug iikuib anuka anig oopanu ameg gaduak ele doum atepete? Amu atem ha, nug edua neegte?” aon apig. <sup>20</sup> Ag anam od mataeg amu a apid. “Imu am nid ihinih amu i dootep, nug anig oopanu ameg gaduak ele doum. <sup>21</sup> Amge atem ha, nug aaku neegte, o aun nug ameg he, ena dayom amu i ii dootep. Ag nug od meteg! Nug okai meum. Nug nuka nuhig nai matieb doyeg!” aoya apid. <sup>22</sup> Anig mameg ele a Juda okai dilag badapid amunu a anam apid. Juda

okai ag tatam nai inam qagapig. “Danab laipu laa nug Jesus am Kristus aku amu nug lamidput, Juda dilag nai doyak lag uua, ad dimitim noku,” apig amunu a badapid. <sup>23</sup> Ag anam apig amunu danab anig mameg ele a apid. “Nug okai meum, ag nug od meteg!” aoya apid.

<sup>24</sup> Juda okai ag ahilah nai doon, danab amu genab ameg gaduak dayom, gemu ena daate oolagpa genab doopig amunu ag baula ameg gaduak ena dayom ele amu onigpa eeg udie, ag nug amegpa apig. “Na Kayakib binag me! Ig dootem, danab amuam hipunin danab,” aon apig. <sup>25</sup> Ag anam aeg amu nug aum. “Nug hipunin danabtai o iitatai amu da ii dootem amge keeke laipuib da dootem. Da anuka amel gaduak daami am Nug he, da edue neegtem. Aakuib da dootem,” awa aum. <sup>26</sup> Nug anam a amu ag nug amegpa apig. “Nug atemnab heum? Nug amenpa atemnab he, na neegtem?” aon apig. <sup>27</sup> Ag anam aeg amu nug aum. “Da tatam amelagpa ami amge ag ii dab mepig. Adinu ag baula dooglagnu heteb? Ag ele nuhig ipunitak awak danab daaglagnu hetebte?” awa aum. <sup>28</sup> Nug anam a amu ag guhudidnana apig. “Na aaku nuhig ipunitak awak danab. Ig am Mosesnu ipunitak awak danab. <sup>29</sup> Ig dootem Kayak Nug Moses nai metom amge danab amuam adebtagnu udiom amu, ig ii dootem,” aon apig. <sup>30</sup> Ag anam aeg amu danab ameg ena dayom ele amu nug aum. “Imu am laanab, ag Nug adepanu udiom ii dooteb amge Nug he, da amel obatom. <sup>31</sup> Ig dootem Kayak Nug hipunin danab odelag ii doote amge danab aun nug Kayaknu kobol dim

lamidte, Nug oo atem niite amu hete ele amu Kayak Nug ode doote. <sup>32</sup> Anuka dig makpanu udiak gemu batak amu danab laa nug anig ameg gaduak ele menue, danab laa ameg babaite, ameg ena dayomnu laa ii dootem. <sup>33</sup> Kayak Nug danab imu meeb ii udilo amu Nug keeke inam laa ii helo,” awa aum. <sup>34</sup> Nug anam a amu ag amegpa apig. “Na anin nug menuite, na hipunin danab daame amunu adinu na ig ipunigkutnu hetem?” Ag anam anana, lamiteg, dimitim ukom.

<sup>35</sup> Jesus ag danab amu lamidpignu nai doya, Nug danab amu matia anta, amegpa aum. “Na Danab Bekalagnu ootpa genab dootemte o iita?” awa aum. <sup>36</sup> Jesus anam a amu nug aum. “Nadi, Danab Bekalag amu aun? Na ape da nuhignu oolpa genab dookul,” awa aum. <sup>37</sup> Nug anam a amu Jesus aum. “Na Nug anidme amu danab Nug geha iiku na ele nai maditep am Nug aakuib,” awa aum. <sup>38</sup> Anam a amu danab nug aum. “Nadi, da oolpa genab dootem,” awa aum. Nug anam anana, dup noa Jesus binag meum. <sup>39</sup> Danab nug anam he, Jesus aum. “Da danab epediadkulnu wan imupa udimi amunu amu danab ag ameg gaduak bia elele ii daanna dooteb ele amu, ag oolag edueb, ena daaglag. Laa ag danab nug ena neegte amubia ag aka ahilagnu, ‘Ig am danab ena,’ ateb amu, ag oolag ii edueb, ag ena ii daamna,” awa aum. <sup>40</sup> Do gumak danab-Parasia laa apa nug gukuidna daapig ele amu, ag amunu apig. “Ig elete danab ena iita, amenig gaduak bia?” aon apig. <sup>41</sup> Anam aeg am Jesus Nug ag amelagpa aum. “Ag amelag gaduak daalo amu ag hipunin iita daalob. Amge

ag, ‘Ig amenig ii gaduom,’ ateb amunu am ahilag hipunin ana daate,” awa aum.

## 10

### *JESUS NUG AM SIPSIP GUMAK DANAB ENA*

<sup>1</sup> Jesus Nug nai amu matia mala, Nug nai imu ele matiom. “Da genab ag amelagpa atem. Danab laa nug sipsipnu ad odpa ii note, nug ad leta note ele, danab amu nug am yabhok danab. <sup>2</sup> Am danab nug adnu odpa tutuku note ele amu, nug am sipsipnu gumak danab. <sup>3</sup> Amunu nug udie amu sipsipnu od gumak danab nug od matula mete, nug oopa no, sipsip nuhikud ag nug baag dooteb. Ag dooteb amu nug nuhikud sipsip onilagpa ewa diia, dimitim gotē. <sup>4</sup> Haen nug sipsip nuhig diia dimitim uka amu nug anuqa ugeke, sipsip ag nug baag doon dim lamidteb. <sup>5</sup> Ag danab laa dim ii lamidteb. Iita. Ag oolna goteb. Adinu? Ag danab laa amu nug baag ii dooteb,” awa aum. <sup>6</sup> Jesus Nug keeke danab ag dooteb ii dooteb ele ou aqata, amu ipuanatata mehuqom amge ag adinu aum amu ag oolag ii matiom

<sup>7</sup> amunu Jesus Nug nai laa matiaya aum. “Sipsip ag laulag oopa gokulagnu amu ag ahilag ad odepa goteb. Amubia da genabnab genab ag amelagpa atem. Da daka am hab abpa ukaknu od daatem. Danab ag hab abpa gokulagnu amu daib ehanadpi gokulag. <sup>8</sup> Laa oh anuqna udina, ‘Da am Kristus,’ apig ele amu ag am yabhok danab amu keeke laanu mauhnoak eeda awak danab. Amge sipsip ag danab amu baalag ii doopig. <sup>9</sup> Da daka am od. Laa nug dahilpa doa, ad oopa noa amu haen oh

ena daaku. <sup>10</sup> Yabhok danab nug sipsip yab awa, aqeb mauhkulag<sup>nu</sup> udite amge da udimi ele imu amu, ag bau dayak enanag amu madakulnu udimi. Ag aopeg ahilagpa am bak daaku.

<sup>11</sup> Da daka amu sipsip gumak danab ena. Sipsip gumak danab ena nug sipsip ena daaglag<sup>nu</sup> mauhkunu dayeb amu mauhku. <sup>12</sup> Danab nug udat nob aokunu udat hete amu nug sipsip gumak danab genab iita, nug sipsip mamelag ele iita amunu nug qai dakud anta amu nug sipsip uuata, oola ugeke, qai dakud nug sipsip aqa lamate, mauhnoak oolna, matatun tamtam goteb.

<sup>13</sup> Danab amu nug nob aokunuib udat hete amunu nug oolte. Nug sipsip pehetak dab ii madate.

<sup>14</sup> Da daka amu sipsip gumak danab ena. Da dahilad sipsip doyardtem, sipsip ag ele da dooidteb

<sup>15</sup> amubia Mame Nug da dooidede, da Mame dootem. Laa ele, da dahilad sipsip, ag ena daaglag<sup>nu</sup> dab mein dayeye, dahil bau dayak hepi iita meku.

<sup>16</sup> Da am sipsip laa, ad dahil imupan iita, amu ele dahilad, da amu ele diikul. Diipi, ag da baal dooglag amu, ag oh sipsip ameg laipuib daapeg, ahilag gumak danab ele daib daakul.

<sup>17</sup> Da daka bau dayak dahil edue aokulnu da dahil bau dayak hepi iita meku amunu Mame Nug dahilnu oo mauhte.

<sup>18</sup> Laa nug heeb, bau dahil iita mekunu am iita, da daka dahil bau hepi, iita meku. Da dahil gagatagpa bau dayak dahil hepi, iita meku amu dahil gagatagpa bau dayak dahil edue aokulnu dootem. Am da Mame topanu gagatag amu aomi," awa aum.

<sup>19</sup> Jesus anam a, Juda danab ag doona, edun opatna, ameg adit daapig. <sup>20</sup> Anam daanna,

kudum laa ag apig. “Oudi nau nuhigpa daate amunu Nug ootot qe hetede. Ag adinu Nug ode dooteb?” aon apig. <sup>21</sup> Ge laa am apig. “Imu am danab oudi nau elenu nai iita. Oudi nau nug danab ameg gaduak ele heeb, ameg opatkute?” aon apig.

### *JUDA AG JESUSNU KEKED DAAPIG*

<sup>22</sup> Am Jerusalem apa metid hobul laa, ag anuka mana metak lag od edun matulpig ele, metid hobul amu daulagpa daakunu haen be, danab ah oh apa qag mepig. Haen amuam oug haen. <sup>23</sup> Jesus Nug haen amupa mana metaknu lag talilia gediak oopa noa, Solomonu aben ateb ele amupa noa, aben amupa oiyom. <sup>24</sup> Nug anam noa oiyeye, Juda ag dona hipaidna, Jesus oo metan daanna apig. “Na haen ganebnab hepe, ig dab mak adit ele daatem amu iita meku? Na genab Kristus daatem dayeb amu na peh etana tutuku miag atiak ape dootu!” aon apig. <sup>25</sup> Anam aeg amu Jesus Nug ag amelagpa inam aum. “Da amelagpa ami amge ag oolagpa genab ii doopig. Udat oh da Mame onigpa hetem amu ele, da am Kristus, ipuanadte. <sup>26</sup> Amge ag am dahil adpanu sipsip iita amunu ag oolagpa genab ii dooteb. <sup>27</sup> Sipsip dahilad amu ag da baal dooteb, da ele ag doyadtem. Doyatiti ag da dim lamidteb. <sup>28</sup> Ag da dim lamidegeg, da ag bau dayak hanhannu madatem. Ag padal ii memana. Iitanab. Laa nug da epelpanu matakata ele ii diima. <sup>29</sup> Da Mamel Nug ag da medom amu, Nug am keeke oh edatak. Laa ag Nug epegpanu iinab mataka aoma. <sup>30</sup> Da Mamel ele amu i am laipu,” awa aum.

<sup>31</sup> Jesus anam a amu Juda okai ag baula men aon, makudpeg mauhkunu hepig. <sup>32</sup> Makudkulagnu



heeg amu Nug ag amelagpa aum. “Da Mamenu gagatagpa udat ena ena kudumnabpa danab ah ehanadmi amu adi udat amu ena iita anidna, da menpa oidpeg mauhkulnu heteb?” awa aum.

<sup>33</sup> Jesus anam a amu Juda ag apig. “Ig udat ena laa dab meta, na menpa oidput mauhkutnu ii hetem. Iita. Na Kayak dapidna, aon aon qedatem, na danab hamu amge na, ‘Da am Kayak,’ aon ame amunu ig hetem,” aon apig. <sup>34</sup> Aeg amu Jesus aum. “Ahilag dopa Kayak ode inam yak niite. ‘Da ami, ag am Kayak ganiapud.’ <sup>35</sup> Anuka Kayak nai wan imupan danab, amu dilagpa ukom amu Nug ahilagnu, ‘Ag am Kayak ganiapud,’ aum. Aria ig dootem, Kayak nai keeke laa ham bupuak ii ipunigte? Iita! Tutukuib ipunigte <sup>36</sup> amunu adinu ag dahilnu, ‘Nug Kayak dabiita, awa awa qedte,’ ateb? Kayak Nug da tituanida, meide wanpa udimi. Nug anam heum amu anuka Nug wan imupan danab laa dilag, ‘Ag am Kayak ganiapud,’ aum amunu, ‘Da am Kayak beka,’ ami am adinu ag amunu, ‘Nug Kayak aben aokunu hete,’ aon apig. <sup>37</sup> Da Mamenu udat ii hetem dayeb doona amu ag oolagpa genab aib doopig. <sup>38</sup> Amge da Mamenu udat hetem dayeb, ag amunu dahil nainu oolagpa genab dooglagnu elele iita dayeb amu da udat laala, danab haknu elele iita hetem amu, ag amu anidna, oolagpa genab doyeg! Amupa ag doyak aona amu Mame Nug dahilpa dayeye, da nuhigpa daatem amu tutuku dooglag,” awa aum. <sup>39</sup> Jesus Nug anam a, ag nug adaglagnu hepig amge Nug ag edataa ukom.

<sup>40</sup> Anam daye amu Jesus Nug edua, Jordan le

matada, anuka Johannes nug danab ah dig ma layatak matompa, apa uka dayom. <sup>41</sup> Nug apa dayeye amu danab ah kudum Nug gumidna udipig. Udin amu ag apig. “Genab, Johannes nug am kobol danab hekunu elele iita laa ii heum amge nug nai oh danab imunu matiom ele amu oh genabib,” aon apig. <sup>42</sup> Ag anam anana, danab ah kudum ag Jesusnu oolagpa genab doopig.

## 11

### *LASARUS MAUHOM*

<sup>1</sup> Aria danab laa onig Lasarus, Betani ted, nug am ode ele. Amu Maria Mata ele, a ele am ab amupanu. <sup>2</sup> Maria, nug am Jesus baegpa goden gokadowa, iki udugpa opiom ele, ah amu aakuib, nug apinag Lasarus nug ode meum. <sup>3</sup> Lasarus nug ode meum amunu nug apinkud a nai meeh, Jesus topa uke apid. “Nadi, na nuhignu oot mauhte ele, danab amu aaku ode meum,” aoya apid. <sup>4</sup> Jesus Nug amu doya aum. “Ode amuam danab nug mauha iita maknu iita. Iita, ode amupa Kayak Nug binag okai aweb, Kayak Beka da, da ele amupa binal okai aokul,” awa aum. <sup>5</sup> Jesus Nug Maria, Mata amu a apinlah Lasarus ele, Nug amu dilagnu am oo mauhtom. <sup>6</sup> Aria Nug Lasarus ode me doyowa, Nug ded adit laa ele apa dayom. <sup>7</sup> Dayaya dimpa Nug nuhikud ipunitak awak danab amelagpa aum. “Ig edut, Juda gotu!” awa aum. <sup>8</sup> Nug anam a amu ag apig. “Nadi, tumainab iiku Juda okai ag menpa oidkulagnu hepig am na edun gokutnu aaku hetemte?” aon apig. <sup>9</sup> Aeg amu Jesus aum. “Aam laipu am aua 12 haen oh iite daate? Am danab

nug amunpa aam amahlakpa oite, nug amahlak anidte amunu nug na ii qete. <sup>10</sup> Amge danab nug tuqan oite dayeb amu nug amahlak laa iita amunu nug na qete,” awa aum. <sup>11</sup> Jesus nai amu matia mala am Nug aum. “Ig lainig Lasarus nug niiom amge da uken mad edakul,” awa aum. <sup>12</sup> Anam a amu ipunitak awak danab ag apig. “Nadi, nug niite dayeb amu nug ena daaku,” aon apig. <sup>13</sup> Jesus Nug Lasarus mauhomnu aum amge ag oolagpa amu, “Nug genab niite,” aon apig. <sup>14</sup> Ag anam dab meegeg amu Jesus Nug miag atia amelagpa aum. “Lasarus mauhom <sup>15</sup> amge da nug ele apa ii daamuḍ amunu amu da ool gamag ahaḥe. Adinu? Da ahilagnu dab meḥem. Da dahil uḍat laa hepi, ag kobol amupa ag dahilnu oolagpa genab dooglag. Ahapeg, ig gota anidtu!” awa aum. <sup>16</sup> Amu Tomas, nuhignu ag Didimas ele aḥeb amu, nug ipunitak awak danab laa amelagpa aum. “Dopeg, ig goput, Juda hepeg, ig Nug ele mauhtu!” awa aum.

### ***JESUS NUG HIBAITAK, BAU DAYAK ELE DIILAH***

<sup>17</sup> Aria ag ahan gona, Beḥani apa teeg amu apanu danab ag amelagpa Lasarus ded wadele modpa niiomnu apig. <sup>18</sup> Jerusalemnu Beḥani ukak amu nakok kilomita adit o laipu keeke anam, umanab iita <sup>19</sup> amunu Juda kuḍum ag Mata Maria ele a lailah mauhom, a amunu a oolah ena daakunu ehanatkulagnu gumatna gopig. <sup>20</sup> Ag gona daaegeg, Jesus Nug uḍieye, Mata nug Jesus ibpa uḍitenu nai doya, nug Jesus ib manpa anidkunu ukom amge Maria nug laka dayom. <sup>21</sup> Mata nug uka, Jesus anta, amegpa aum. “Nadi, na ipa daalom amu da apinal nug ii mauhlo. <sup>22</sup> Amge da dooḥem,

na geha iiku ele keeke laanu Kayak unuqidpe amu Nug amu medaku,” awa aum. <sup>23</sup> Nug anam a amu Jesus Nug amegpa aum. “Na apinam amu edua hipaidku,” awa aum. <sup>24</sup> A amu Mata nug aum. “Ao da dootem, gogtak haenpa danab ah edun hipaidkulag, haen amupa nug ele edua hipaidku,” awa aum. <sup>25</sup> Anam a amu Jesus Nug aum. “Edua hibaitaknu diig am da, bau dayak hanhannu diig amu ele daib. Laa nug dahilnu oopa genab doote ele amu, nug mauhku amge nug bauklel aoku. <sup>26</sup> Amu danab oh ag dahilnu oolagpa genab dooteb ele amu ag bauklelib daaglag. Na nai amu ootpa genab dootemte?” awa aum. <sup>27</sup> Jesus anam a amu Mata aum. “Ao Nadi, na am Kristus. Na Kayak Beka wan imupa udime. Da amu oolpa genab dootem,” awa aum.

<sup>28</sup> Mata anam anana amu nug uka, Maria onigpa e do, omala, nakok giginpa uka, qinonob amegpa aum. “Ipunitak danab udiom, upa uma ibpa dayaya, na oninpa ete,” awa aum. <sup>29</sup> Maria nai amu doya, nug pahanab aha, Jesus gumita ukom.

<sup>30</sup> Jesus Nug abpa paha ii teum, Nug ibpa, Mata uka antom ele, aben amupa apa dayom. <sup>31</sup> Aria Juda ag Maria ele laka apa nug oo ena daakunu daapig ele amu, ag nug pahanab aha, dimitim uke anidna, ag, “Nug apinag mahidkunu matmatpatai gokunu gotte,” anana, ag ahan, Maria dim lamidna gopig. <sup>32</sup> Maria nug uka, Jesus aben amupaib dayeye antom. Anta amu guguita wana, Jesus baegpa dup noa aum. “Nadi, na ipa daalom amu da apinal ii mauhlo,” awa aum. <sup>33</sup> Maria anam a amu Jesus Nug Maria gayeye anta, Juda ag Maria ele udipig

amu, ag ele gaaegeg anat<sub>o</sub>m. Anam anata amu Nug ele oo hik bopane, gaak<sub>u</sub>nu heum. <sup>34</sup> Anam haaha amu Nug aum. “Ag adepa mepig?” awa aum. A amu ag apig, “Nadi na u<sub>d</sub>in ante,” aon apig. <sup>35</sup> Anam aeg amu Jesus gayom. <sup>36</sup> Juda ag amu anidna apig. “Anteg, Nug danab amunu oo huanak mauhom,” aon apig. <sup>37</sup> Amge laa amu apig. “Nug am danab amelag gad<sub>u</sub>ak ele amu he ena daateb am nug haen imupa daalo amu danab imu ehaniteb ena daalotai?” aon apig.

### *JESUS LASARUS MAD ETOM*

<sup>38</sup> Aria Jesus aaku anam baula oo hik bopanene, Nug mod guguita waum. Mod amuam ag men ode laa bapaidpig. Bapaidna men laapa mod ode amu tonapig. <sup>39</sup> Amu Jesus Nug amelagpa aum. “Ag men ode amu matuleg!” awa aum. Nug anam aum amge Mata nug aum. “Nadi, nug ded wadele modpa niiom amunu udig ote,” awa aum. <sup>40</sup> A am Jesus Nug aum. “Da tatam na amenpa ami. ‘Na ootpa genab dookut amu na Kayak ebehi gemu anidkut,’ ” awa aum. <sup>41</sup> Jesus anam a, ag men mod ameg matulpig. Matuleg, Jesus hab atan neekaka aum. “Mame, na unuqitak dahil doome amu da amunu, ‘Ena heme,’ awe atem. <sup>42</sup> Da dootem, na dahil unuqitak haen oh dootem amge da danab ah daateb imu dilag heina, nai imu na amenpa atem. Amupa ag na da meide u<sub>d</sub>imi amu ag oolagpa genab dooglag,” awa aum. <sup>43</sup> Nug anam unuqitowa amu Nug huanak ewa aum. “Lasarus, na ahan dimitim do!” awa aum. <sup>44</sup> Anam a amu danab mauhak amu aha, dimitim doum. Ag nug baeg, epeg, idu amu oh lamen laa linen amupa

itapig amunu nug udie, Jesus Nug amelagpa aum. “Lamen uhuqpeg ukad!” awa aum.

*IKI DANAB AG JESUS QEKULAGNU NAI QAGAPIG*

<sup>45</sup> Jesus danab mauhak mad ete amu Juda kudum Maria anidkulagnu udipig ele amu, ag Jesus udat amu he anidna, ag nuhignu oolagpa genab doopig. <sup>46</sup> Amge laa ag gona, do gumak danab-Parasia amelagpa Jesus adi heum amunu madipig.

<sup>47</sup> Matieg amu mana metak danab okai amu do gumak danab-Parasia ele ag Juda dilag hetodiak okai onig Sanhidren, amunu danab oh qag maadna apig. “Ig atem hekunig? Danab imu Nug eponak keeke, danab hekunu elele iita kudum hete. <sup>48</sup> Ig dootta daapput, Nug inamib heeb amu danab ah oh nuhignu oolagpa genab dooglag. Genab doopeg amu geha Rom ag, ‘Umuam king laa ahom daate,’ anana, ag udin, ihinig mana metak lag lopadna, hepeg nauheb, ig ele lamigpeg, laih gokunig,” aon apig. <sup>49</sup> Amge danab laipu laa, ag oolagpa dayom ele amu, nug onig Kaiapas, nug mad amupa mana metak danab dilag iki dayom ele amu, nug laikud amelagpa aum. “Ag keeke laipu iinab dooteb. <sup>50</sup> Ag imunu dab mak iitai aopig? Ig oh Rom epegpa mauhkunig am ena iita. Yo, danab ah oh mauhkulag am ena iita amge danab laipu nug danab ah oh abenlag awa mauhku, amuam ena amunu danab umu Nug mauhad!” awa aum. <sup>51</sup> Nug nukā nuhig dab makpa Jesus mauhkunu nai amu ii aum. Iita. Mad amupa nug mana metak danab dilag iki dayom amunu Jesus mauha, Juda ehanadkunu aum.

<sup>52</sup> Amu ele nug Jesus Juda dilagib mauhkunu ii aum. Iita. Nug Jesus mauhku amupa danab ah atu ohpa daateb amu Nug ag oh diia, qag maateb, ag Nug bekod daaglagnu aum.

<sup>53</sup> Aria Juda okai ag ded agupaib dig mena, Jesus qepeg mauhkunu nai madipig <sup>54</sup> amunu Jesus Nug baula Juda oolagpa miag atiak ii oiyom. Nug ab amu uua, aha ab laa onig Epraim, atu tadak guguitak, apa ukom. Uke, nuhikud ipunitak awak danab ele ag ab amupa daapig. <sup>55</sup> Ag apa daaegeg, Juda dilag Pasowa metid hobul miag doum amunu ab laih laihnu danab ah oh Jerusalem apa, ag aka tatam oolag bapaidna opia awak daapeg, hobul dig mekunu hena gona amu, <sup>56</sup> ag Jesus madipig. Ag mana metak lag oopa daanna amu ag aka aka nug od metan apig, “Ag atem dooteb? Nug Pasowanu metid hobul anidkunu iitai udimu,” aon apig. <sup>57</sup> Am mana metak iki danab amu do gumak danab-Parasia ele ag tatam danab amelagpa, danab laa nug Jesus adepa daate amu doya amu nug ag amelagpa ab, Jesus aon mani guitakpa mekulagnu apig.

## 12

### *MARIA JESUS GODENPA LAAITOM*

<sup>1</sup> Aria Pasowa metid hobul bekunu heehe, ded eblaih laipu anam daye, Jesus Nug tatam danab mauhe mad etom ele, onig Lasarus, amu apagpa, Betani ukom. <sup>2</sup> Ag Jesusnu lewa nakok ab amupa heeg, Mata nug e yeeye, Lasarus nug amu, Jesus, danab laala ele ag balapa daanna e lapig. <sup>3</sup> E lanana, Maria nug goden, bala onig nadpa

hepig ele, mutudig enanag, ug nuhig amu paun laipu, nuhig daden okai ele amu, nug amu awa, Jesus baeg laaitowa, iki udugpa opiom. Anam he, godennu mutudig amu lag amu oh tona malom. <sup>4</sup> Amge nuhikud ipunitak awak danab laa, Judas Iskariot, nug Jesus keked epelagpa meku ele amu, nug aum. <sup>5</sup> “Goden umu amu nuhig nob am mad laipunu udat nob editak amunu adinu nug danab laa daden mekunu ii meum? Nug anam ha, men dodo aololob amu nug dadek danab matalo,” awa aum. <sup>6</sup> Judas nug anam awa aum amge nug dadek danab dilag dab ma ii aum. Iita. Nug ipunitak awak dilag men dodonu kunup gumama yab aotom amunu men dodo amu kunuppa melo amu nug yab aolo. <sup>7</sup> Judas nug anam a amu Jesus Nug aum. “Uue! Ah imu nug da boomidkulagnu bedul babaitom. <sup>8</sup> Dadek danab amu, ag ag oolagpa hanhan daaglag amge da am ag ele haen oh ii daamta,” awa aum.

<sup>9</sup> Ag anam henan daaegeg, Juda kudum ag Jesus ab amupa daate doona, ag gumidna udipig amge ag Jesusib anidkulagnu ii udipig. Iita. Jesus Nug Lasarus modpanu mad ete ahom amunu ag Lasarus anidkulagnu ele udipig. <sup>10-11</sup> Juda kudum ag Lasarus anidkulagnu gona, ag Jesus he, Lasarus modpanu edua hibaitom amu dab menana, ag Jesus oolagpa genab doopig amunu mana metak danab okai ag Lasarus ele qepeg mauhkunu nai madipig.

### *JESUS KING BIA JERUSALEM UKOM*

<sup>12</sup> Aria, danab ah ameg nadi ag metid hobul anidkulagnu udin apa daapig. Daaegeg, ded nadi



ii nak haenpa, buti nekunu dayom amu, danab kudum ag Jesus Jerusalem udite amu doopig. <sup>13</sup> Ag anam doona, ag ad epeg udug ele anam qialadna, Jesus ibpa anidkulagnu gopig. Ukaeg, Jesus ele nug uda tena apig. “Ig Kayak onig humatu! Danab imu Nug Kayak onigpa udite. Kayak Nug itidte. Nug am Israel dilag King! Kayak Nug itidte,” aon apig. <sup>14</sup> Jesus Nug donki nag laa nakok okai meum ele amu anta, Nug amupa ta dayom. Nug Kayak naipa, nai laa daate, amubia heum. Nai amuam inam. <sup>15</sup> “O Sion, Na aib badame! Ante, king nahip aaku udite, Nug donki nag, nakok okai meum ele amu, nug atan dayaya udite.” <sup>16</sup> Yak anam niite amge Jesusnu ipunitak awak danab ag tatam nai amunu diig amu ag oolag ii maikom. Dimpa Jesus Nug hab abpa uke, haen amupa ag nai yak nuhignu niite amu danab ag Jesusnu hepig amunu ele dab mepig.

<sup>17</sup> Aria Lasarus nug mauha modpa niiom, haen amupa am danab ah kudum ag ele daanna, Jesus Nug Lasarus onigpa ewa mad ete, aha dimitim do anidpig amu, ag amunu matiegeg, <sup>18</sup> danab ah laala ag Jesus Nug eponak keeke, danab hekunu elele iita amu heum, ag nai amu doopig amunu ag Jesus ibpa anidkulagnu gopig. <sup>19</sup> Ag gopig amunu do gumak danab-Parasia ag aka aka nai matin apig. “Ig nuhig ib oo nekunignu elele iita. Anteg! Danab ah oh Nug dim lamidteb,” aon apig.

### **GRIK LAALA AG ELE JESUS ANIDKULAGNU GOPIG**

<sup>20</sup> Amu haen amupa Grik laala ag ele Jerusalem apa danab ah ag metid hobul amu anidkulagnu

u<sub>k</sub>aegeg, ag ele oh gopig. <sup>21</sup> Grik danab amu ag Betsaida ted Pilipus gumidna gona, amegpa apig. “Danab nadi, ig Jesus anidk<sub>u</sub>nignu oonig daate,” aon apig. <sup>22</sup> Aeg am Pilipus u<sub>k</sub>a, Andreus amegpa aum. A amu Andreus nug Pilipus ele oh goya, Jesus amegpa apid. <sup>23</sup> Aeh amu Jesus Nug amelap<sub>a</sub> aum. “Danab Bekalag da, da onil o<sub>k</sub>ai aokulnu haen aaku u<sub>d</sub>iom. <sup>24</sup> Genabnab genab da ag amelagpa a<sub>t</sub>em. Buah aeg nug wanpa ii na qe<sub>k</sub>u, qadu beeb<sub>e</sub>b, aeg nug ele ii bedaku amu aeg nug aakuib daate amge nug wanpa na qa bedaku dayeb amu nug bau ba, meu huanak o<sub>t</sub>e. <sup>25</sup> Anam amunu aun nug be<sub>d</sub>u wan imupanuib bau daakunu dab mak o<sub>k</sub>ai aote amu nug padal me<sub>k</sub>u. Amge aun laa nug wan imupan be<sub>d</sub>u bau dayak oo ii qe<sub>t</sub>e, amunu dab mak o<sub>k</sub>ai ii aote amu, nug bau dayak nuhig haen oh nuhigpa daaku. <sup>26</sup> Amu laa nug dahil u<sub>d</sub>at hekunu dayeb amu nug da dim lamidad! Am da adepa daatem am dahil u<sub>d</sub>at danab nug ele apa daaku. Am laa nug da dim lamid<sub>k</sub>u amu Mame Nug ele nug binag humaku,” awa aum.

*JESUS NUG AG NUG AD EMAITAKPA  
ATULKULAGNU AUM*

<sup>27</sup> Jesus Nug nai amu anana, Nug nai tudita aum. “Da oolpa dab mak kudumnab aotem. Da, ‘Mame, na haen imunu mua nau imu hepe da ii anidpa,’ akulte? Iita! Da u<sub>d</sub>at imu hekulu u<sub>d</sub>imi,” awa aum. <sup>28</sup> Jesus Nug anam anana amu Nug nai tudita aum. “Mame, na binan humape o<sub>k</sub>ai dayad!” awa aum. Anam a amu baag laa hab atannu na aum. “Da tatam binal o<sub>k</sub>ai humami amu baula o<sub>k</sub>ainab humakul,” awa aum. <sup>29</sup> A amu danab ah laala apa daapig amu ag, “Hakad qeum,” aon apig. Laa

am apig, “Engel nug, Nug amegpa nai maṭiom,” aon apig. <sup>30</sup> Ag anam aeg amu Jesus ag amelagpa aum. “Baag imu am da ehanidkunu ii neum. Iiṭa! Ag ehanadkunu neum. <sup>31</sup> Gemu amu wan imupan danab oh dilag epediak haen. Gemu haen imu amu, wan imunu gumak danab nau amu lamiteb dimitim goḱu. <sup>32</sup> Amge da ad emaitakpa atulidkūlag, haen amupa amu da danab ah oh eedadpi, ag dagatolpa dokūlag,” awa aum. <sup>33</sup> Jesus Nug nuhig mauhaknu ib amu miag atikunu, Nug nai anam maṭiom.

<sup>34</sup> Nug anam maṭie amu danab ah kudum nug odepa aon apig. “Ig dopa nai inam doomut. ‘Kristus Nug hanhan daaku!’ Am atemun na Danab Bekalag aihkūlagnu atem? Danab Bekalag Nug am aun?” aon apig. <sup>35</sup> Anam aeg am Jesus Nug aum. “Ag haen naḱoknab laa ele amahlak ele daaglag. Haen imupa ag amahlak ele amunu gatatu ag tonadmanu ag amahlak ele oiweg! Laa nug gatatupa oiṭe amu nuhig ib ii anidṭe. <sup>36</sup> Ag amahlak ele daanna amu amahlaknu oolagpa genab doweg! Ag oolagpa genab dooglag amu ag amahlak bekod daaglag,” awa aum. Jesus nai amu awowa, uuata, ag amelagnu loḱumom.

### *JUDA KUDUM AG JESUSNU OOLAGPA GENAB II DOOPIG*

<sup>37</sup> Jesus Nug danab ah kudum amelagpa eponak keeke, danab hekunu elele iṭa heum amge ag nuhignu oolagpa genab ii doopig. <sup>38</sup> Ag oolagpa genab ii doopig amunu ag heeg, propet Jesaianu nai aaku elele metom. Propet nug nai inam aum. “Nadi, danab laa nug ihinig nainu oopa genab ii

dootē. Am danab laa nug Nadi Nug udat gagatag heum amu udat amunu diig ii dootē.” <sup>39</sup> Ag nai ii doopig, Kayaknu udat okainu diig ele ii doopig amunu ag Jesusnu oolagpa genab ii doopig. Keeke amunu am Jesaia nug nai laa inam ele yom. <sup>40</sup> “Nug danab amu ag amelag he gaduom, ag oolag ele he, gagatag epom amunu ag amelagpa keeke laa anidna, oolag edueb, oolag tutuku dab medapeg, da ag bapaladkulnu elele iita.” <sup>41</sup> Jesaia Jesus binag okainab antom amunu nug Jesusnu aum.

<sup>42</sup> Jesaia anam anta yom amubia iki danab kudum ag oolagpa genab ii doopig amge laala, nakok kudum, ag oolagpa genab doopig. Ag oolagpa genab doopig amge ag do gumak danab-Parasia, amu dilag badapig. Ag ag lamadpeg, nai doyak lag dimitim daamnana badana, oolagpa genab doyak amu miag ii atipig. <sup>43</sup> Ag danab ag binalag mekulagnu dab mak okai aopig. Kayak Nug ag binalag mekunu amu, ag amunu dab mak okai ii aopig.

<sup>44</sup> Amu Jesus huanak ewa nai matiaya aum. “Laa nug dahilnu oopa genab dootē amu nug dahilib oopa genab ii dootē. Iita. Aun nug da meide udimi ele amu, Nug nuhignu ele oopa genab dootē. <sup>45</sup> Am laa nug da anidte amu nug aun da meide udimi ele amu Nug ele anidte. <sup>46</sup> Amu laa nug dahilnu oopa genab dootē, nug gatatupa ii oimanu amu da amahlak awen, wan imupa udimi.

<sup>47</sup> Am laa nug dahil nai doya dim ii lamidte amu da nug ii epedipa. Da wan imupan danab epediadkulnu ii udimi. Iita. Da ag eduen diikulnu udimi. <sup>48</sup> Laa nug da di meda, dahil nai ii aoku

amu nuhig epediak, nug aokunu apa ana daate. Nai da nug dookunu matimi ele amu, nai amu geha nug hetodiakpa epediku. <sup>49</sup> Da daka dahil dab makpa nai ii maditem. Iita. Mame, Nug da meide udimi, Nug da udat medom ele amu, Nug da adi nai akulnu, adi madikulnu ele medom. <sup>50</sup> Am da dootem, Mamenu nai amu bau hanhan dayaknu nai amunu da nai amu maditem ele amu Mame Nug amelpa aum amuib maditem,” awa aum.

## 13

### *JESUS IPUNITAK AWAK DANAB BAELAG IHOM*

<sup>1</sup> Pasowa metid hobulnu ded ii neumpa, Jesus Nug doyom, Nug wan imu uua, Mameg topa gokunu haen aaku malom. Nug anam doya, Nug danab ah nuhikudnu oo mauhe, Nug genab anam huanak doyom amu ipuanatom. <sup>2</sup> Nug nuhikud ipunitak awak danab ele e lanan daanna, Satan nug tatam Judas Iskariot, Simon beka, nug Jesus keked epelagpa mekunu dab mak metom amu <sup>3</sup> Jesus Nug Mameg keeke oh Nug epegpa meum doya, Nug Kayak topanu udiom, Nug edua Kayak topa gokunu ele doya, <sup>4</sup> Nug e uua aha, ulahnu lamenu nuhig uda maama, bedu opiaknu lamenu laa awa, imuagpa takom. <sup>5</sup> Nug anam hewowa, le tapidpa qe noum. Qe no, aaku Nug dig ma, nuhikud ipunitak awak danab baelag ihaha amu lamenu imuagpa takom ele, amupa baelag lepu opiom. <sup>6</sup> Am Nug baelag lepa ihaha uka uka, Simon Petrus gumita wa, Petrus nug Jesus od metom. “Nadi, na da bael ihakutnute hetem?” awa aum. <sup>7</sup> Anam a amu Jesus amegpa aum, “Keeke da hetem

imu na geha imu ii dootem amge dimpa dookut,” awa aum. <sup>8</sup> Awa a amu Petrus aum. “Nadi, na da bael iinab ihamna, gemu buti adi ele iinab ihamna,” awa aum. A am Jesus Nug aum. “Da na baen ii ihakul amu na dahil iita,” awa aum. <sup>9</sup> Anam a amu Simon Petrus aum. “Nadi, anam dayeb amu na da baelib aib ihame. Na epel, ikil ele oh ihe!” awa aum. <sup>10</sup> Petrus anam a amu Jesus Nug amegpa aum. “Laa nug le layom ele amu, nug bedu dubutid iita amunu nug baegib iheb, nug bedu oh opia awak daaku. Ag am opia awak daateb amge ag ohnab opia awak iita,” awa aum. <sup>11</sup> Jesus Nug laa Nug keked epelagpa mekunu amu doyom amunu Nug, “Ag oh opia awak iita,” awa aum.

<sup>12</sup> Aria, Jesus ag baelag iha malowa amu nuhig ulah lamen edua awa, ade no, edua dayom. Dayaya Nug ipunitak awak danab amelagpa aum. “Da keeke ahilagpa hemi imu ag oolag maitete? <sup>13</sup> Ag dahilnu, ‘Thinig ipunitak danab amu ihinig Nadi ele,’ aon ateb. Da genab da anam aaku daatem amunu ag ena anam ateb. <sup>14</sup> Da am ahilag Nadi amu ahilag ipunitak danab ele amu da ag baelag ihaladmi amunu ag ele lailkad baelkad ihalateg! <sup>15</sup> Da kobol imu ag ipuanadmi, ag ele kobol da gemu ahilagpa hemi amubia heig! <sup>16</sup> Da genabnab genab ag amelagpa atem, begbeg danab nug gumak danab nuhig ii edidte. Am danab nug udatpa gotte amu nug danab me gotte ele amu ii edidte. <sup>17</sup> Ag amu doona, ag anam hekulag amu ag oolag gamag ahaku.

<sup>18</sup> Da maditem imu amu da ag oh ahilagnu ii atem. Da danab dahilad, da tituanadmi ele amu, da ag diilag dootem. Amge Kayak nai niite amu

genab meu beku. Nai amu inam ate. ‘Danab nug da ele e latep ele amu, nug da tapidkunu baeg humaku!’ <sup>19</sup> Da imu ii beumpa iku ag amelagpa atem amunu dimpa beeb amu ag dooglag, da am Kayak beka. <sup>20</sup> Da genab ag amelagpa atem. Laa nug udat danab, da nug mei gote ele amu, nug oo meta humidte amu nug da aku oo meda humidte. Laa nug da oo meda humidte amu nug laa, da mede udimi ele amu, Nug oo meta, humidte,” awa aum.

### *JUDAS JESUS KEKED EPELAGPA MEKU*

<sup>21</sup> Jesus nai anam matiowa, Nug oopa ugnab doyom. Oopa ug doya amu Nug nai matia aum. “Da genabnab genab ag amelagpa atem. Ag oolagpanu laipu laa nug da keked epelagpa meidku,” awa aum. <sup>22</sup> Nug anam a amu ipunitak awak danab ag aka aka nug neekidpig. Nug aunnu-tai aum amu ag ii doopig. <sup>23</sup> Ipunitak awak danab laa, Jesus nuhignu o huanak mauhtom ele, nug Jesus guguitaknab dayom. <sup>24</sup> Dayeye amu Simon Petrus nug epegpaib amegpa aum. “Na od mete, Nug aunnu ate,” awa aum. <sup>25</sup> Anam a amu ipunitak awak danab Jesus guguitaknab dayom ele amu nug aum. “Nadi, na aunnu atem?” awa aum. <sup>26</sup> Nug anam a amu Jesus amegpa aum. “Da geha bret tapid lewa elepa mepi nob, taulen medakul amu danab nug akuib,” awa aum. Aria Jesus Nug bret lewapa ma awa, Simon beka Judas Iskariot metom. <sup>27</sup> Judas e amu awe amu Satan nug oopa noum. No amu Jesus Nug nuhignu aum. “Keeke na hekutnu hetem am paha he!” awa aum. <sup>28</sup> Anam aum amge balalpa daapig ele, amunu laipu laa Jesus Judas

amegpa aum ele, nai amu diig ii doyom. <sup>29</sup> Laala ag Judas men do<sub>o</sub> kunup gum<sub>o</sub>m amunu, “Jesus Nug pasowa hobulnu keeke awaknutai a<sub>o</sub>te,” o i<sub>o</sub>ta, “Dadek danab dilag keeke daden ma ma<sub>o</sub>taknutai a<sub>o</sub>te,” aon apig. <sup>30</sup> Aria Judas nug bret maha amu awowa, pahanab dimitim uk<sub>o</sub>m. Dimitim amu gatatu ele aaku neum.

### *Do BAU*

<sup>31</sup> Judas dimitim u<sub>o</sub>ke amu Jesus Nug aum. “Danab Bekalag da aaku binal okai aomi. Dahilpa Kayak ele binag okai aote. <sup>32</sup> [Kayak Nug dahilpa binag okai aweb] da nuhigpa binal aokul. Yo, Nug pahanab da binal okai medaku. <sup>33</sup> O nid naunau dahilad, haen nakoknab da ag ele daagnig amu dimpa ag da matidkulag. Da tatam Juda amelagpa ami, amu gemu ele ag amelagpa iiku a<sub>o</sub>tem. Ag aben da gotem ele, amupa ag gemu gokulagnu elele i<sub>o</sub>ta. <sup>34</sup> Amu gemu da do bau ag mada<sub>o</sub>tem. Ag lailkad dilag oolag mauhad! Amu da ahilagnu ool mauhte, amubia ag ele ag lailkad dilag oolag mauhad! <sup>35</sup> Ag lailkad dilag oolag mauheb amu danab laa ag miagib dooglag, ag amu ipunitak awak danab dahilad,” awa aum.

<sup>36</sup> Jesus anam a amu Simon Petrus od metom. “Nadi, na adepa gokut?” Petrus anam a amu Jesus Nug amegpa aum. “Aben da gotem ele, amupa amu gemu na da dim lamidna gokutnu elele i<sub>o</sub>ta amge dimpa amu na dim lamidkut,” awa aum. <sup>37</sup> Anam a amu Petrus nug aum. “Nadi a<sub>o</sub>temun? Da geha imu na dim lamidkulnu elele i<sub>o</sub>tate? Da geha na ehaniten, da nahip aben awen mauh<sub>o</sub>kul amunu amu, da ugnab laa ii doo<sub>o</sub>tem,” awa aum.



38 A amu Jesus odēpa awa aum. “Na dahil aben aona mauhkut-te? Da genab na amenpa ațem. Na tuğan imupa, na dahilnu, ‘Da Nug ii dooțem,’ aon, haen ewam batak akut. Na haen ewam anam ape, dimpa matuk dawai nug gaaku,” awa aum.

## 14

### *MAME TOPA UKAKNU IB AMU JESUSIB*

<sup>1</sup> “Ag oolag ug aib dayom. Ag Kayaknu oolagpa genab doona, ag dahilnu ele oolagpa genab doyeg!  
<sup>2</sup> Da Mamel laug amu oo kudum ele amu da laa ahilagnu bapaidkulnu gotem. Anam laa ii daalo amu da ag amelagpa alom. <sup>3</sup> Da uken, ahilag aben babaitoya amu da eduen udien, omalate gokul. Adinu? Da daakulpa amu, ag da ele daagnig. <sup>4</sup> Amu da gokulnu ib amu ag dooteb,” awa aum. <sup>5</sup> Anam a amu Tomas od mețom. “Nadi, na adēpa gokut amu ig ii dooțem amunu ig ațem heta, ib na gokut ele amu doognig?” awa aum. <sup>6</sup> A amu Jesus Nug nob ma aum. “Ag laih gokulagnu henana amu ag ibpa goteb. Amubia da am hab abpa ukaknu ib. Laa ele amu genab diig am da, bau dayaknu diig amu ele daib. Danab nug Kayak gumita gokunu amu, daib nug ehanidpi gokunu elele daațem. <sup>7</sup> Ag da dooidlob amu ag da Mamel ele doolob amge geha iiku amu ag Nug dooteb amu ag ele anidteb,” awa aum. <sup>8</sup> Anam a amu Pilipus nug aum. “Nadi, Na Mama ipunigpe, amupa ig elele doognig,” awa aum. <sup>9</sup> Pilipus anam a amu Jesus aum. “Pili-pus, haen elabnab da ag ele daamut am na iite dooidtem? Danab nug da anidte amu nug Mama anidte. Am adinu na Mama anidkutnu od medațem?”

<sup>10</sup> Da Mame topa daaiyi, Mame Nug dahilpa daate. Pilipus na amu ootpa genab iite dootem?” awa aum. Jesus Nug anam matiowa, Nug nai tudita ag oh amelagpa aum. “Nai da ag amelagpa maditem ele imu, amuam da daka, dahil dab makpanu iita. Mame Nug dahilpa daate amu Nug nuhig matiak hete. <sup>11</sup> Da Mama topa daaiyi, Mame Nug dahilpa daate, nai amu ag oolagpa genab doyeg! Iita dayeb amu da keeke danab hekunu elele iita kudum hetem, ag amu anidna, ag oolagpa genab doyeg! <sup>12</sup> Da genabnab genab ag amelagpa atem. Laa nug dahilnu oopa genab doote ele amu nug udat da hetem imu amu nug ele heku. Nug udat da hetem ele amu, udat dahil amu editak, okainab ele heku. Adinu? Da geha Mame topa gokul. <sup>13</sup> Amu Mama Nug binag okai dahilpa aokunu amu ag keeke laanu da onilpa apeg amu da hekul. <sup>14</sup> Keeke oh ag da onilpa da od medapeg amu da hekul.

### *JESUS KAYAK OUDI MEEB UDIKUNU AUM*

<sup>15</sup> Am ag dahilnu oolag mauhte dayeb amu dahil do ena tutuku dim lamidkulag. <sup>16</sup> Amu da Mamel od medapi, Nug ehanitak laa madaaku. Nug ag ele hanhan daaglag. <sup>17</sup> Nug am Kayak Oudi, Nug nai genab Kayaknu ag ipuanadte. Wan imupan danab, ag oolagpa genab ii dooteb ele amu, ag aoglagnu amu elele iita. Adinu? Ag Nug ii anidteb am ag ele ii dooteb. Amge ag da ele geha iiku daateb, ag am Nug dooteb, Nug ag ele daateb, dimpa Nug ag oolagpa ele daaku. <sup>18</sup> Da ag nid laa, nug anig mameg ele mauhpid, nukanab daate, amubia ii uuadpa. Iita, da gumate udikul. <sup>19</sup> Nakok laa ele wan imupan danab, ag oolagpa genab ii

dooteb ele amu, ag da ii anidmana amge ag dahlad daateb amu ag am da anidkulag. Da haen amupa bau daakul amunu ag ele bau daaglag. <sup>20</sup> Haen amupa amu, da Mame topa daatem, ag am dahilpa daateb, da ahilagpa ele daatem amu ag dooglag. <sup>21</sup> Am aun laa nug dahil do awa, tutuku dab medata dim lamidte ele amu, nug aakuib am dahilnu oo mauhte. Am aun nug dahilnu oo mauhte amu Mame Nug ele nuhignu oo mauhku. Da ele nuhignu ool mauhebeb, da dahil kobol miag atiak nug ipunidkul,” awa aum.

<sup>22</sup> Jesus anam awa a amu Judas laa, Judas Iskariot iita, nug aum. “Adinu igib nahip kobol ipunigkut amge iita adi dilagpa amuam iita?” awa aum. <sup>23</sup> Judas laa amu nug anam a amu Jesus Nug aum. “Danab laa nug dahilnu oo mauheb amu nug dahil nai ele dim lamidku. Aria danab amunu amu da Mamel Nug nuhignu oo mauhku. Amu da Nug ele, i nuhigpa nepud, ig oh laipu, danab ewam lag laipupa daateb, amubia haen oh daagnig. <sup>24</sup> Laa nug dahilnu oo ii mauhte ele amu nug nai dahil ele dim ii lamidte. Am ag dooteb, nai amuam dahil iita. Nai amuam Mame, Nug da meide udimi ele amu, nuhig nai.

<sup>25</sup> Keeke imu oh amu da ag ii uuadmi, da ag ele daatta, haen imupa iiku maditem. <sup>26</sup> Amge ahilag ehanitak, Kayak Oudi, da Mamel Nug da onilpa meeb udiku amu, Nug udia, keeke oh ipuanata, da ag amelagpa adi ami amu Nug heeb, ag daulagpa doku. <sup>27</sup> Da madod awe ii gopa. Iita! Da dahil madod ag madatem. Wan imupa madod amubia ii madatem amunu ag oolag ug aib qeum. Ag aib badapig.

28 'Da ag uuate ukoya, eduen ag gumate udikul,' ai doopig. Ag genab dahilnu oolag mauhloob, ag da Mame topa gokulnu amu ag amunu oolag gamag ahalo. Adinu? Mame Nug am Nadi, Nug da edilak. 29 Keeke imu neeb, ag oolagpa genab dooglagnu amu da keeke imu ii neumpa iiku da ag amelagpa ami. 30 Wan imupan okai nug amu nug udat nuhig hekunu haen miag beum daate amunu da ag ele nai kudum baula ii matimta. Nug dahilpa keeke laa hekunu gagatag iita 31 amge danab ah oh ag da Mamenu ool mauhte anidkulagnu, ag da Mame Nug adi hekulu amelpa matiom amuib hetem ele dooglagnu amu da iiku hetem. Ahapeg ig gotu.

## 15

### *JESUS NUG MUDI ONIG GREP GENAB*

1 Da am mudi laa onig grep amu nug ebekud diig. Da anam daaiyi amu da Mamel Nug am gumak danab. 2 Mame Nug dahilpa epeg oh meu ii niiteb ele amu okulata gedadte. Epeg laa meu niiteb ele amu ag meu huana okulagnu amu Nug bapaladte. 3 Da nai ag matami amu he, ag ena bepig daateb. 4 Ag dahilpa daapeg, da ahilagpa daakul. Mudi grep epeg nug nuka awaitak dayaya meu niikunu elele iita, nug mudi grep tuditak dayaya meu niikunu elele amubia ag da ele ii daagnig amu ag ele meu ena ii omana. 5 Da amu mudi grep, ag amu mudi grep ebekud. Laa nug dahilpa daate, da nuhigpa daatem amunu nug meu kudumnab ote. Ag da uuidna amu ag keeke laa hekulu agnu elele iita. 6 Laa nug dahilpa ii daate ele, nug mudi grep ebekud danab ag okulna akaeg uke bunadteb

amubia daate. Danab ag muḍi grep ebekud amu ag qag maadna akaeg, ab adu nadipa teeg eote. <sup>7</sup> Ag dahilpa daapeg amu dahil nai ahilagpa dayeb, ag oolag daate amu ag amunu da oḍ medanna, ag aoglag. <sup>8</sup> Ag meulkad huanak okulag amupa da Mamel Nug onig okai aoku. Amupa ag dahil ipunitak awak danab genab ele daaglag.

<sup>9</sup> Mame Nug dahilnu oo mauhte amubia da ahilagnu ool mauhte. Ag dahil oo mauhak amu oopa ag hanhan dayeg! <sup>10</sup> Da Mamenu do tutuku dim lamitete, nuhig oo mauhak oopa daatem amubia ag dahil do tutuku dim lamidkulag amu ag haen oh dahil oo mauhak oopa daaglag. <sup>11</sup> Da oo gamag ahak dahil ahilagpa daakunu nai imu matimi. Amupa oo gamag ahak ag oolagpa am baknab daaku. <sup>12</sup> Dahil do amu inam. Da ahilagnu ool mauhte, amubia ag ele lailkad dilagnu oolag mauhad! <sup>13</sup> Laa nug laikud dilag dab ma, nuhig bau dayak padate amu oo mauhak kobol amuam oo mauhak kobol laa oh edidte. <sup>14</sup> Amu ag da do matami, ag amubia hekulag amu ag dahil kadoi daaglag. <sup>15</sup> Begbeg danab nug danab okai nuhig adi hete amu nug ii doote, nug, 'Na gona udat amu he,' ate amuib aaku nug hete amunu da baula ahilagnu begbeg ii atem. Iita. Da ahilagnu kadoi atem. Adinu? Da Mamel keeke oh amelpa a doomi amu ohnab matiye ag doopig. <sup>16</sup> Ag da ii tituanidpig. Iita! Ag da onilpa adi keekenu Mame amegpa unuqidpeg amu Nug ag madakunu, da ag dahilad daaglagnu tutuanaten, ag gona oina, meulag okulagnu amu meu amu hanhan daakunu maadmi. <sup>17</sup> Da do iiku ag madatem, ag lailkad dilagnu oolag mauhad!

**DANAB AH IPUNITAK AWAK DANAB KEKED MATAGLAG**

<sup>18</sup> Danab ah ag oolagpa ahilag<sup>nu</sup> nau, ninig ele doopeg amu ag doyeg, danab ah amu ag tatam dahilnu anam doopig. <sup>19</sup> Ag wan imupanu danab ele laipu daalob, wan imupanu danab ag ahilag<sup>nu</sup> ag lailkad bia doolob amge ag wan imupanu danab ele laipu iita. Da ag danab amu oolagpanu tituanaten, wan imupanu kobol imu uuglag<sup>nu</sup> ag maadmi amunu diig amupa ag ahilag<sup>nu</sup> keked daateb. <sup>20</sup> Nai da ag amelagpa ami ele amu daulagpa doad! Nai amuam inam. 'Begbeg danab nug gumak danab ii edidte.' Amu aun adi laa ag da lamidna gedilpig amu ag ag ele lamadna gedadkulag. Aun laa ag dahil nai dim lamidpig ele amu ag am ahilag nai ele dim lamidkulag. <sup>21</sup> Amge laa ag Mame, Nug da meide udimi amu, ag Nug ii dooteb amunu ag, ag da onilpa oiteb doona, ag ahilagpa ehed hekulag. <sup>22</sup> Da udien, danab amu ag amelagpa nai laa ii matilom amu ag hipuninnu ab iita daalob amge gemu ag hipuninnu ab iita daaglag<sup>nu</sup> ib laa iita. <sup>23</sup> Am laa nug da guhudilte amu nug da Mamel ele guhudidte. <sup>24</sup> Da keeke danab hekunu elele iita, danab laa ii heum ele amu, ahilagpa ii helom amu ag hipuninnu ab iita daalob amge ag anidna, hamu bia doona, da amu da Mamel ele ag oolagpa ihinihnu nau, ninig ele doopig. <sup>25</sup> Am ahilag dopa yak niite amu elele metom. Nai amu inam. 'Ag oolagpa, dahilnu diig iitapa nau, ninig ele doopig.'

<sup>26</sup> Kayak Oudi, Nug onig laa Ehanitak, Nug amu keeke ohnu genab diig, Kayak topa daate amu da

Nug geha mepi, ag ehanadkunu ahilagpa udiku. Nug amu Mame nuhigpa dayaya udiku. Geha Nug udia, nai dahilnu ag amelagpa matieb dooglag. <sup>27</sup> Amu ag ele dahil nai matinna oiweg! Adinu? Ag dig makpanu da ele daaut udie, gemu ele daatem.

## 16

<sup>1</sup> Ag ahilag oopa genab doyak ii padamnanu da nai imu oh amelagpa ami. <sup>2</sup> Danab ag Juda dilag nai doyak lag oopanu lamadkulag. Dimpa haen beeb, ag ag aqapeg mauhpepeg, 'Ig Kayaknu udat ena hetem,' aon akulag. <sup>3</sup> Danab amu ag da Mama ele ii dooitpig amunu ag anam hekulag. <sup>4</sup> Da nai imu matiminu diig am haen amu beeb, da dab mak awaknu nai imu matami amu ag dab mekulag. Dig makpa da ag ele daamut amunu da nai imu ag amelagpa ii ami, gemuib maditem.

### *JESUS MAMEG TOPA UKĒB, KAYAK OUDI NEKU*

<sup>5</sup> Gemu amu da laa, Nug meide udimi ele amu, Nug gumite gotem. Amu ag oolagpa laipu laa nug da od meda, 'Na adepa gotem,' laa ii ate. <sup>6</sup> Da nai matimi, diig amunu ag oolagpa oo doyak okainab aoteb. <sup>7</sup> Da genab ag amelagpa atem. Da hab abpa gokul am ena. Da ii gopi am ena iita. Adinu? Da ii gopi amu Kayak Oudi, ahilag ehanitak, Nug ii nema amge da tein dayeye, da hepi, Nug ag gumata neku. <sup>8</sup> Nug udia, wan imupan danab hipuninnu, kobol enanu amu epediaknu ele ag ipuanadku. <sup>9</sup> Nug danab ag hipuninnu ipuanateb, ag hipunin diignab, am danab ag dahilnu oolagpa genab ii dooteb amu, dooglag. <sup>10</sup> Nug kobol enanu ipuanateb, ag da Mame topa gotem amunu

ag kobol ena hek<sub>u</sub>lagnu elele daaglag, ag amu dooglag. <sup>11</sup> Nug epediaknu ele ipuanateb, ag wan imupan okai, Satan, nug aaku epediak awa malom amunu ag hetodiakpa ii daaglagnu ib aaku babaitak daate amu ele dooglag.

<sup>12</sup> Da nai kudum ag amelagpa madikulnu hetem amge geha imu ag aoglagnu elele iita. <sup>13</sup> Amge Kayak Oudi, genabnu diig, Nug na, keeke oh genabnuib amu ipuanadku, Nug nuka nuhig dab makpa ii matima. Iita. Nug adi doyom aakuib madiku. Adi adi dimpa beku amu ele ipuanadku. <sup>14</sup> Nug amu nai genab dahil awa, ag madaku amunu amupa Nug da binal okai medaku. <sup>15</sup> Mamenu keeke oh amu dahil amunu da ami. 'Kayak Oudi Nug keeke dahil amu awa, ag ipuanadku.' <sup>16</sup> Nakok laa ele ag da ii anidmana. Nakok laa ele dimpa amu ag da baula anidkulag," awa aum.

<sup>17</sup> Jesus anam a amu ipunitak awak danab nuhikud laala ag aka aka nug od metan apig. "Nai nuhig imu am diig atemu? 'Nakok laa ele ag da ii anidmana amu nakok laa ele dimpa amu ag da edun anidkulag.' Nug inam ele aum, 'Da Mama topa gokul.' <sup>18</sup> 'Nakok laa ele,' nai amuam diig atemu? Nug aditainu nai amu aum amu ig diig ii dootem," aon apig. Ag anam anana, aka aka nug od metaegeg, <sup>19</sup> amu Jesus Nug doyom, ag Nug ele od metaglagnu hepig amunu Nug ag amelagpa aum. "Da nai ami amunute ag aka aka nug od medteb? Da inam ami. 'Nakok laa ele ag da ii anidmana amu nakok laa ele dimpa amu ag da edun anidkulag!' awe ami. <sup>20</sup> Da ag amelagpa genabnab genab atem. Wanpan danab ah ag am oolag gamag ahaku amge



geha ag dahilad daateb amu, ag nadi gaaglag, ag oo doyak ele gaaglag. Ag geha oolag ug ele daaglag amge ahilag oo ug dayak am edueb, ag oo gamag ahak dooglag. <sup>21</sup> Ah nug nid menukunu haen male doya amu nug oo ug daate amge nug nid menuowa amu nug baula ug ii doote. Adinu? Nug nid menue doum amunu nug oo gamag ahate. <sup>22</sup> Anamnab aaku. Gemu amu ag oolag ug ele daateb amge da geha ag edue anadkul. Ag geha haen amupa oo gamag ahak okai dooglag. Laa amu nug ahilag oo gamag ahak amu qeeb nekunu amu elele iita,” awa aum. <sup>23</sup> Jesus Nug anam anana, Nug nai tudita aum. “Geha ded amupa ag keeke laanu da iinab od medamna. Da genabnab genab ag amelagpa atem, Mame Nug ag keekenu oolag heeb, da onilpa Nug od medapeg amu Nug ag madaku. <sup>24</sup> Udie udie, gemu batak ag keeke laanu da onilpa Nug od ii medapig. Ag oolag gamag aheb, oolag mekunu amu ag od mena amu geha aoglag.

<sup>25</sup> Da keeke danab ag dooteb ii dooteb ele ou aqate, ipuanatete, keeke imu ohnu ag amelagpa matimi amge geha haen amu udieb, da baula ag amelagpa anam bia ii madipa. Iita! Da nai miag matule, Mamenu madikul. <sup>26</sup> Haen amu udieb, ag geha Nug da onilpa od metaglagnu amu da ag oulag dayeye, Nug unuqidkulnu ii atem. <sup>27</sup> Iita! Mame Nug nuka ahilagnu oo mauhte. Adinu? Ag dahilnu oolag mauhte amu ag ele da am Kayak topanu udimi oolagpa genab dooteb amunu Nug ahilagnu oo mauhte. <sup>28</sup> Genab, da Mama topanu udie, wanpa nemi daatem. Gemu am da wan imupan ahe, edue Mama topa gokul,” awa aum. <sup>29</sup> Nug

anam a amu nuhikud ipunitak awak danab ag Nug amegpa apig. “Gemu na nai miagib matulna maditem, na keeke danab ag dooteb ii dooteb ele ou aqatna, ipunitak nai ii atem. <sup>30</sup> Gemu amu ig dootem, na amu keeke oh dootem amunu danab laa nug tatam na od meteb, na dimpa nug nob medakutnu iita. Iita. Na od mak amu matu doon malame. Amupa na Mame topanu udime amu ig oonigpa genab dootem,” aon apig. <sup>31</sup> Anam aeg amu Jesus amelagpa aum, “Gemu iikute ag oolagpa genab doopig? <sup>32</sup> Anteg! Haen aaku udite, aaku miag doum, geha ag lamadpeg, da uuidna, matatun, apalagpa ukadkulag. Amge da daka ii daapa. Iita. Da Mamel Nug da ele daagnih. <sup>33</sup> Da nai imu ag madod aon daaglagnu amelagpa ami. Wan imupa amu ag ug anidkulag amge ag ug aib aqom! Adinu? Da wanpanu ug oh edidmi,” awa aum.

## 17

### *JESUS UNUQITOM*

<sup>1</sup> Jesus nai matiowa, Nug ameg huma, hab atan neeka dayaya, unuqita aum. “O Mame, haen aaku udiom. Da am na bekat. Da na binan humakulnu amu na da binal okai hume! <sup>2</sup> Na da danab ah medame ele amu, da ag bau hanhan dayak madakulnu, na da danab ah oh dilag ikilag daakulnu gagatag medame amubia na da binal medakut. <sup>3</sup> Bau hanhan dayak amuam inam. Danab ag na da ele dooitkulag. Na amu na naka am Kayak genab. Da amu da am na bekat, na da meide udimi. <sup>4</sup> Udat na da medame amu da hein malami, amupa da wan imupa na binan okai humami. <sup>5</sup> O

Mame, anuka wan ii dayeye, da na ele daada, da binal okai ele daaiyi udiom amu gemu na binal amuib edun mede!

<sup>6</sup> Ao Mame, da wan imupan danab na medame amu da ag amelagpa na diitnu mehuqi doopig. Ag am nahipad, na da medame amu, ag nahip nai dim lamidteb. <sup>7</sup> Ag aaku dooteb, keeke oh na da medame amu nahipanu udiom. <sup>8</sup> Nai oh na da medame ele amu da ag matai aopig. Da nahippanu udimi amu ag genab doopig, na da meide udimi, ag amu ele oolagpa genab doopig. <sup>9</sup> Amu da ahilagnu unuqidtem. Da haen imupa wan imupan danab, ag oolagpa genab ii dooteb ele amu, da amu dilagnu ii unuqidtem. Iita. Da danab na medame, amu dilagnu unuqidtem. Adinu? Amu oh am nahipad. <sup>10</sup> Dahilad imu oh am nahipad. Nahipad oh am dahilad ele. Ag da binal meteb. <sup>11</sup> Gemu da wanpa baula ii daapa. Da na gumite gotem amge dahilad imu ag wan imupan danab, ag oolagpa genab ii dooteb ele amu, ag oolagpa daateb. O Mame opia awak, na oninpa danab ah da medame imu dab madape, da na ele laipu daateb amubia ag oolag laipu ele dayeg! <sup>12</sup> Haen da ag ele daamut amu da dab mataiyi, ag da onil, na medame ele, amupa daapig. Laipu laa ii padal meum. Laipu aakuib am nug nuka nuhig dab mak dim lamitom ele amu, nug aakuib padal meum. Amupa nai yak nahip genab meu oum.

<sup>13</sup> Da gemu na gumite gokulnu doyena amu dahilad danab ag oo gamag ahak dahil oh aoglagnu amu da amunu nai imu maditem. <sup>14</sup> Nai nahip amu da ag matai, iita adi ag dahilad imu dilagnu ag oolagpa nau, ninig ele dooteb. Adinu? Da

wan imupanu iita amubia ag ele wan imupanu iita. <sup>15</sup> Da na ag wan imupanu diiadkutnu od ii medatem. Iita. Na hepe, Satan nug ag diiadkunu elele iita daaku amunu na od medatem. <sup>16</sup> Ag wan imupanu danab iita, da ele wan imupanu iita amubia. <sup>17</sup> Amunu nai nahip am genab amunu amupa na hepe, ag na noompa elelenab opia awak dayeg! <sup>18</sup> Na wan imupa meide udie, danab ah oolagpa daami, amubia da ag maadpi, ag ele danab ah oolagpa daaglag. <sup>19</sup> Da dahilad imu ag da anidna, nahip nai pehetak dim lamidna, opia awak daaglagnu amu da na oden tutukunab dim lamidtem.

<sup>20</sup> Da dahilad ipunitak awak danab imu ahilagnu aakuib ii unuqidtem. Iita. Imu ag dahilnu madipeg, danab laala ele ag dahilnu oolagpa genab dooglag, da ahilagnu ele iiku unuqidtem. <sup>21</sup> O Mame, Na dahilpa daatem, da nahippa daatem, amubia amu ag i ele laipu daagnignu unuqidtem. Danab laala amu ag nid dahilad ag oolag laipu daateb anidna amu ag oolagpa, na he da udimi, genab dooglagnu amu da ag oh oolag laipu daaglagnu unuqidtem. <sup>22</sup> Na da ele i laipu daatep, amubia dahilad imu ag laipu daaglagnu amu na da binal medame ele amu da ag matami. <sup>23</sup> Dahilad amu ag oolag laipunab dayeb, iita adi ag na da meide udimi, na dahilnu oot huana mauhom amubia na dahilad, ahilagnu ele oot huanak mauhte dooglagnu amu da ahilagpa daapi, na dahilpa daakut. <sup>24</sup> Mame, danab ah na da medame amu haen da binal ele daakul amu ag da ele aben amupa daagnignu ool daate. Ag da binal anuka wan ii dayompa na dahilnu

oot mauhe, na da medame amu ag anidkulagnu ool daate. <sup>25</sup> O Mame tutukunab, iita adi amu ag na ii dooidteb amge da am na dooidtem amu dahilad imu ag na da meide uđimi amu dooteb. <sup>26</sup> Da na dit ahilagpa miag atimi. Amu na dahilnu oot mauhte, oo mauhak amu ag oolagpa daakunu, da ele ag oolagpa daakulnu amu, da baula na dit ipuanadkul,” awa unuqitom.

## 18

### *JUDAS JESUS KEKED EPELAGPA MEUM*

<sup>1</sup> Jesus anam unuqita male, nuhikud ipunitak awak danab ele ag ahan gona, le Kidron matadna, olip dad laa apa dayom amu ag dad amu oopa nopig. <sup>2</sup> Judas, nug Jesus keked epelagpa meum ele amu, nug ele dad amu doyom. Adinu? Haen kudum Jesus Nug ipunitak awak danab ele ag dad amupa qag medapig. <sup>3</sup> Amunu Judas nug Rom dilag ban danab amu mana metak danab okai amu do gumak danab-Parasia, ahilag daup laala ele diie, aben amupa udipig. Ag amahlak, hul amu bannu keeke ele aon gopig. <sup>4</sup> Jesus Nug keeke oh nuhigpa hekulag amu oh doya malom amunu ag udieg, Nug guguata wana aum. “Ag aun maditeb?” awa aum. <sup>5</sup> Anam a amu Nug odepa aon apig. “Jesus Nasaret ted,” aon apig. Aeg am Jesus ag amelagpa aum. “Da iiku,” awa aum. Judas, nug Jesus keked epelagpa meum ele amu Nug ele oh hipaidna daapig. <sup>6</sup> Hipaidna daegeg, Jesus amelagpa, “Da iiku,” awa a, ag otaina, bitumtum gona, wanpa nena qepig. <sup>7</sup> Ag nena qeeg amu Jesus Nug baula od matom. “Ag aun maditeb?” awa aum.

Anam a amu ag apig, “Jesus Nasaret ted,” aon apig. <sup>8</sup> Anam aeg am Jesus aum. “Da am danab amu iikuib, da matu amelagpa ami. Ag da matidna dopig dayeb amu ag danab imu uuadpeg ukeg!” awa aum. <sup>9</sup> Nug nai amu aum amu Nug anuka nai laa aum, nai amu meu oum. Nai Nug anuka aum am inam. “Na da medame amu laipu laa padal ii meum.” <sup>10</sup> Aria Simon Petrus nug qep elab ele amunu nug eeda awa, mana metak danab dilag iki, nuhig begbeg laa daug nadiap amu hoiyom. Nid amu onig Malkus. <sup>11</sup> Anam he amu Jesus Petrus amegpa aum. “Na nahip qep elab edun abenpa me! Atemu? Le mua hai gokodpa daate, Mame medom ele amu, da iite lapa?” awa aum.

<sup>12</sup> Nug anam a amu ban danab amu ban danab ikilag amu Juda ikilag, ahilag daup ele ag Jesus adana, mudipa hipalpig. <sup>13</sup> Hipalona, ag aon, tatam Kaiapas tanab Anas topa gopig. Kaiapas nug mad amupa mana metak danab dilag iki dayom. <sup>14</sup> Kaiapas amu nugib tatam Juda amelagpa inam aum. “Danab laipu laa geha danab ah abenalag awa mauhku amu ena,” awa aum.

### *PETRUS, “DA JESUS II DOOTEM,” AWA AUM*

<sup>15</sup> Am Simon Petrus nug ipunitak awak danab laa ele, a Jesus dim lamidpid. Mana metak danab dilag iki nug ipunitak awak danab laa amu doyom amunu nug mana metak danab amu laug ad oopa noum <sup>16</sup> amge Petrus nug ad dimitim, od odepa dayom. Anam dayeye amu ipunitak awak danab laa, mana metak danab dilag iki nug doyom ele amu, nug wana, nid ahin od gumom ele amu amegpa anana, Petrus omala oopa noum.

<sup>17</sup> Ipunitak awak danab, mana metak danab dilag iki nug doyom ele amu, nug anam he, nid ahin od gumom ele amu Petrus amegpa aum. “Na ele danab imunu ipunitak awak danab laatai?” awa aum. Nid ahin nug anam a amu Petrus aum, “Da iita!” awa aum. <sup>18</sup> Haen amuam oug haen amunu begbeg danab amu daup ele ag oug doona, ag ab laa ilan udignana daaegeg, Petrus nug ele ulah qeum amunu nug ele gakaḁak aokunu ab ilapig amu uḁika dayom.

### *MANA METAK DANAB DILAG IKI JESUS OD METOM*

<sup>19</sup> Anam dayeye amu mana metak danab dilag iki nug Jesus ipunitak awak danab nuhiḁudnu amu danab ah amelagpa nai mehuḁom amunu ele od metom. <sup>20</sup> Od mete amu Jesus Nug odepa awa inam aum. “Da am danab ah amelagpa aben miag atiakpa nai maḁimi. Da nai doyak lag kuḁumpa am metid lag oopa ele ipunitak maadtami. Da loḁumakpa laa ii mehuḁtami. <sup>21</sup> Amunu adinu na da od medatem? Na danab ag nai dahil doopig ele amu ag od mate! Ag am dahil nai doopig,” awa aum. <sup>22</sup> Anam a amu daup laa hibaita dayom ele amu, epeg oohap ta, hipeg mataḁada aum. “Na mana metak danab dilag iki nai amupate nob medatem?” awa aum. <sup>23</sup> Anam a amu Jesus amegpa aum. “Da nai nau ami dayeb amu na tutuku da amelpa ape doyei! O iita da nai tutuku ami dayeb amu adinu na da oidme?” <sup>24</sup> Jesus anam a amu Anas nug Jesus, epeg mudipa qakak ele, Kaiapas, nug am mana metak danab dilag iki, nug topa me ukom.

*PETRUS BAULA, "DA JESUS II DOOTEM," AWA AUM*

<sup>25</sup> Simon Petrus nug ab udika dayeye, ag nug od medapig. "Na ele nuhig ipunitak awak danab laatai?" aon apig. Anam aeg amu nug aum. "Da iita," awa aum. <sup>26</sup> Mana metak danab dilag ikinu begbeg laa, nug am begbeg danab Petrus daug hoyom ele, amunu tiig laipu amu, nug aum. "Genabnab na ele data apa dayeye, da anidmi," awa aum. <sup>27</sup> Anam a amu Petrus edua amegpa, "Iita," awa aum. Nug anam a amu matuk paha gayom.

*JESUS AON PILATUS TOPA GOPIG*

<sup>28</sup> Matuk gaye amu butuanab Jesus Kaiapas topanu aona, gabman okai top gopig. Ag aon gopig amge ag aka ag gabman okai laug oopa ii nopig. Ag oolagpa, "Gabman okai imu nug Juda iita, ihinig dopa ig nug lag oopa gota, ig oonigpa hipunin ele daagnig amu ig hipunin ele daatta amu ig Pasowa metid hobul ii lamata amunu ig lag oopa ii gomata," anana, lag oopa ii gopig. <sup>29</sup> Anam amunu ag dimitim daaegeg, Pilatus nug dimitim ag gumata doa, amelagpa aum. "Danab imunu nai atemu?" awa aum. <sup>30</sup> A amu ag nug odepa aon apig. "Nug hipunin iita dayeb amu ig omalta, nahippa ii udilom," aon apig. <sup>31</sup> Aeg amu Pilatus nug ag amelagpa aum. "Ag aka Nug aon gona, ahilag dopa nuhig nai epedieg!" awa aum. Anam a amu Juda ag apig. "Rom ag ig danab laa qeput mauhkunu aib apig amunu ig danab laa qeput mauhkunu ii dootem. Diig amunu amu ig na Rom dilag kobolpa danab imu ad emaitakpa aihkutnu oonig daate."



aon apig. <sup>32</sup> Ag nai amu apig amu Jesus Nug kobol adipa mauhkunu aum ele, nuhig nai amu meu oum.

<sup>33</sup> Anam aeg am Pilatus nug edua laugpa noa, Jesus onigpa e do, amegpa aum. “Na Juda dilag Kingte?” awa aum. <sup>34</sup> Pilatus anam a amu Jesus amegpa aum. “Na naka nai amu atemte oo iita laa ag na amenpa apigte?” awa aum. <sup>35</sup> Anam a amu Pilatus nug aum. “Da am Juda tedte? Nahipad danab ah amu mana metak danab okai ele ag na omaidna u<sub>d</sub>in, da epelpa meidpig. Na adi heme?” awa aum. <sup>36</sup> Pilatus anam a amu Jesus aum. “Dahil do madod am wan imupan iita. Dahil do madod wan imupanulob amu dahilad danab ag wagai mepeg, Juda okai ag da ii adailob. Amge dahil do madod amu ipanu iita,” awa aum. <sup>37</sup> Jesus anam a amu Pilatus amegpa aum. “Na anam atem amunu na kingte?” awa aum. A amu Jesus Nug aum. “Na dahilnu, ‘Na am king daatem,’ matina atem. Da nai genab mehuggege oikulu<sub>n</sub>u wanpa nei, da anil menuidom. Laa oh ag nai genab dim lamidteb amu ag dahil nai dooteb,” awa aum.

<sup>38</sup> Nug anam a amu Pilatus amegpa aum. “Nai genab amu adi?” awa aum. Nug anam anana amu aha, dimitim Juda gumata uka aum. “Da nuhigpa ehed laa ii anidmi. <sup>39</sup> Am ag ahilag kobol laa ele daate amu kobol amupa, da Pasowanu metid hobul haenpa danab laipu laa uhuge madatem amunu ag adi ateb? Da Juda dilag King amute uhuge mada<sub>k</sub>ul?” <sup>40</sup> Nug anam aum amge ag qalan apig. “Nug iita! Barabas uhuqna meke!” aon apig. Barabas nug am danab aqaqa, danab dilag keeke mauhnoak aotom.

## 19

<sup>1</sup> Anam aeg amu Pilatus nug a, nuhig daup danab ag Jesus wippa ehed matadpig. <sup>2</sup> Matadna amu daup ag King igipanu bala bia mudi qaun aeg elepa hewona, Jesus igipa adaeg no, king dilag lamen ele aduıteg noum. <sup>3</sup> Ag anam hena, Jesus gumidna uđin apig. “Na am Juda dilag king! Na binan ele,” aon apig. Ag anam anana, ag epelag oohap tena, hipeg matadpig. <sup>4</sup> Ag anam heegeg amu Pilatus edua dimitim doa, amelagpa aum. “Anteg, da nug bedupa ehed hak laa ii anidmi amunu ag amu dooglagnu omalpi, dimitim dokunu hetem,” awa aum. <sup>5</sup> Anam a, Jesus mudi qaun ele igipa meeg dayeye, King dilag lamen enanag amu ele bedupa dayeye, Nug dimitim doum. Do amu Pilatus nug aum. “Ag danab imu anteg!” awa aum. <sup>6</sup> Anam a amu mana metak danab okai, ahilkad daup ele ag Jesus anidna, huanak ena apig. “Ad emaitakpa atule! Ad emaitakpa atule!” aon apig. Anam aeg amu Pilatus nug aum, “Ag aka aon, ad emaitakpa atuleg, da am nuhigpa ehed laa ii anidmi,” awa aum. <sup>7</sup> Pilatus anam a amu ag apig. “Ig do ele amu ihinig dopa amu Nug mauhkunu daate. Adinu? Nug, ‘Da am Kayak beka,’ aum,” aon apig.

<sup>8</sup> Ag anam aeg, Pilatus doya, nug huanak bada, <sup>9</sup> nug edua lag opa noa, Jesus od metom. “Na am ab adepanu uđime?” od meta aum amge Jesus odepa nakok laa ii awom. <sup>10</sup> Odepa ii awe amu Pilatus nug aum. “Atemun? Na dahil nai imu nob iite mekut? Da na ad emaitakpa atulidkulnu api amu atulidkulag, o iita da uhuqidkulnu api amu

uhuqidkulag. Na amu iite dootem?” awa aum. <sup>11</sup> Anam a amu Jesus amegpa aum. “Atannu laa Nug na gagatag ii metalo amu na da ii adailom amunu aun nug da na epenpa meidom ele amu, nuhig hipunin am okainab, nahip editak,” awa aum. <sup>12</sup> Pilatus nai amu doya, Nug Jesus uhuqkunu heum amge Juda ag enan apig. “Na danab amu uhuqpe goku amu na Kaisa layag iita! Danab laa nug nuka nuhig, ‘Da am king,’ ate, nug am Kaisanu keked,” aon apig. <sup>13</sup> Pilatus nug nai anam doya, nug Jesus omala dimitim doa, epediak aben onig Men Duqapig, apa epediak okainu balalpa dayom. Men duqak amunu ag Hibru naipa, Gabata, aon adapig. <sup>14</sup> Ded amuam Pasowanu metid hobul babaitaknu ded amu aam ameg 12 bia dayom. Anam dayeye, Pilatus Juda amelagpa aum. “King ahilag iiku,” awa aum. <sup>15</sup> Anam a amu Juda ag apig. “Aon ad emaitakpa atuleg! Aon ad emaitakpa atuleg!” aon apig. Anam aeg am Pilatus od matom. “Ahilag King amu da ad emaitakpa atulkulnu oolag daatete?” awa aum. Pilatus nug anam a amu mana metak danab okai ag inam apig. “Ig King laa iita. Kaisa aakuib!” aon apig. <sup>16</sup> Anam aeg amu Pilatus Jesus ad emaitakpa atulkulagnu ag epelagpa meum.

### *JESUS AD EMAITAKPA ATULKULAGNU AON GOPIG*

<sup>17</sup> Pilatus Jesus ag epelagpa me, ban danab ag aoeg, Jesus nuka ad emaitak mawewe, aben laa onig Ikilag Ebehi, apa gopig. Hibru naipa ag aben amunu Golgata aon ateb. <sup>18</sup> Ag aben amupa ad

emaitakpa atulpig. Danab adit laa ele nug heqo laih laih atulatpig, ag Jesus gamagpa atulpig.

<sup>19</sup> Pilatus nug nai iki laa ya, ad emaitak igipa atulom. Nai am inam. Jesus Nasaret ted, Juda dilag king. <sup>20</sup> Nug nai amu Hibru naipa, Laten naipa, Grik naipa ele yom. Aria aben ag Jesus ad emaitakpa atulpig ele amuam ab okai guguitak amunu Juda danab kudum ag nai amu eb qepig.

<sup>21</sup> Ag eb qepig amunu mana metak danab okai ag Pilatus amegpa apig. “Na, ‘Nug am Juda dilag king,’ aib yaame. Iita na, ‘Nug nukā, “Da am Juda dilag king,” awa aum,’ anam ye!” aon apig.

<sup>22</sup> Anam apig amge Pilatus nug ag amelagpa aum. “Da yaami am aaku yaami,” awa aum.

<sup>23</sup> Aria daup danab ag Jesus ad emaitakpa atulpig, haen amupa ag nuhig lamen aona, daup danab wadele ag laih laipu laipu anam aopig. Ag amu aona amu ag lamen elab nuhig, baagpanu uka baegpa noak amu ele aoglagnu hepig <sup>24</sup> amge lamem amuam koitak ele iita, kunum anam hepig amunu daup danab ag apig. “Ig lamem amu ii patidmata. Ig dais qid heta, ig oonigpanu aun ig laa oh edika amu nug aoku,” aon apig. Ag anam heeg amu Kayak naipa, nai laa daate amu elele metom. Nai amuam inam. “Ag lamem dahilad otialadna diipig. Ag dais qid hena, danab laa otieg, lamem elab dahil awom.” Daup danab ag anam hepig. <sup>25</sup> Aria ag anam heeg amu Jesus anig amu nug makeg amu Kliopas wau Maria amu Maria Magdala ted ele, ah amu oh ag Jesusnu ad emaitak guguitak daapig. <sup>26</sup> Ag anam daaegeg, Jesus Nug anig amu ipunitak awak danab laa, Jesus Nug nuhignu oo huanak mauhtom ele amu, nug ele

anata, Nug anig amegpa aum. “Ah, nid imu am na bekat,” awa aum. <sup>27</sup> Nug anam anana amu Nug ipunitak awak danab amegpa ele aum. “Imu am na anin,” awa aum. Jesus anam a amu ipunitak danab nug ah amu omala, nug laugpa uka, haen amupa nug dig ma gumeme, oh daadtapid.

### *JESUS MAUHOM*

<sup>28</sup> Keeke amu oh ba male amu Jesus doynom, udat nuhig oh aaku ha malom amunu Kayak naipa yak laa daate, amu elele medakunu, Jesus aum. “Da le baal diite,” awa aum. <sup>29</sup> Nai amu a, ag wain ena iita, apa dayom amunu ag keeke laa lamena bia, le eedte ele, amu onig span, keeke amu wainpa mewona, aon, ud laa onig hisop, amu gumupa itana, meeg te, Jesus lemadu yaapig. <sup>30</sup> Ag Jesus wain anam metaeg lawowa, Nug aum. “Dahil udat aaku hein malami,” awa aum. Nug anam ana mala, Nug dug guda ne mauhom.

<sup>31</sup> Nug mauhom, ded amuam Juda ag ahilag Pasowanu metid hobul bapaidkulagnu ded aaku oqiom. Ded amu ueeb am metid okai bekunu dayom amunu danab gada metid amupa aihatak ii niimanu, Juda ag Pilatus amegpa daup ag gona, danab aihadpig ele amu ag baelag qiipeg, ag mauhpeg, ag diiglagnu apig. <sup>32</sup> Amunu daup danab ag gona, danab adit Jesus ele atulatpig ele amu baelah qiipig. <sup>33</sup> Ag anam qiiatpig amge ag Jesus gumidna wana, Nug mauhom anidpig. Nug mauhom anidna, baeg ii qiipig <sup>34</sup> amge daup danab laipu nug Jesus ban palapalpa qeti atule am pahanab tiig le ele neum. <sup>35</sup> Laa nug keeke imu oh amegpa antom ele amu, nug iiku miag madite.

Nug madite imu am genab, nug doynom amu ag ele oolagpa genab dooglagnu madite. <sup>36</sup> Keeke amu oh am Kayak naipa, nai daate amu genab elele mekunu beum. Nai amunu laa am inam. “Ag ebehi laa ii qiimna.” <sup>37</sup> Am Kayak naipa nai amunu laa ele daate am inam. “Laa ag qeti yaapig ele amu, laa ag Nug anidkulag.”

### *JESUS MODPA MEPIG*

<sup>38</sup> Keeke imu oh dimpa amu Josep, Arimatia ted, nug Juda okai dilag bada, lokumakpaib Jesusnu ipunitak danab oitom ele amu nug uka, Jesus gada aokunu Pilatus unuqitom. Unuqite, Pilatus nug, “Ena,” awa a amu Josep uka, Jesus gada awom. <sup>39</sup> Nikodemus, danab amu nug anuka dig makpa Jesus tuqan gumita ukom ele amu, nug ele udiom. Nug ad diig aditnu tiilah, mutudilah ena ele, tiilah amu koboliatpig, keeke amunu ug amu nakok 75 paun anam, nug amu awa udiom. Laa onig Mir am laa onig Alos. <sup>40</sup> Udie amu a Jesus gada aoya, Mir Alos ele meya, Jesus gada ele linen lamem elab amupa itapid. Juda ag danab gada boomkulagnu hedapig amubia hepid. <sup>41</sup> Amu dad laa, ag Jesus Nug ad emaitakpa atulpig ele, aben amu guguitak apa dayom. Dad amupa men mod bau, anuka danab amupa laa ii mepig ele amu apa dayom. <sup>42</sup> Juda dilag Pasowanu metid hobulnu bapaidkulagnu ded aaku dayeye, amunu metid guguite, metid amupa udat hemananu, men mod amu miag dayom amunu a apa Jesus gada mepid.

## 20

### *JESUS EDUA HIBAITOM*

<sup>1</sup> Juda dilag Metid amu uka male, Maria, Magdala ted, nug butuanab gatatu ele modpa uka, men nadi mod ameg tonom amu laa nug dutune uka, mod amegpa ii dayeye antom. <sup>2</sup> Anam anta, nug edua qaibad uka, Simon Petrus amu ipunitak awak danab laa, Jesus Nug nuhignu oo huanak mauhtom ele amu, a amelahpa aum. “Ag Nadi aon, adehtag mepig amu ig ii dootem,” awa aum. <sup>3</sup> Nug anam a amu Petrus, ipunitak awak danab laa ele a ahai, modpa gokulahnu <sup>4</sup> qaibad gopid. Goyaya amu ipunitak awak danab laa amu nug Petrus edita, nug tatam mod guguita ukom. <sup>5</sup> Nug uka ta, gomela neeke, mod oopa uke amu nug lamen elab, ag amupa Jesus gada itapig ele amu nug amuib niieye antom amge nug oopa ii noum. <sup>6</sup> Nug anam neeka dayeye, dimpa Simon Petrus nug uka ta, nug ipu meta, mod oopa uka, nug ele linen lamen amu anta, <sup>7</sup> nug lamen laa, ag lamen amupa Jesus iki hautpig ele amu, nug lamen amu ele antom. Lamén amu qak dayom bia nuka anam dayeye, linen lamén ele amu nug ele nuka dayeye antom. <sup>8</sup> Anam ante amu ipunitak awak danab nug tatam men modpa ukom ele amu, nug ele oopa noa anta, nug oopa genab doyom. <sup>9</sup> A amelahpanab anam anidya, a Kayak naipa, Jesus Nug edua hipaidkunu nai amu yak daate amu a amunu oolah ii maitom. <sup>10</sup> A anam antoya amu ipunitak awak danab adit a eduya laulahpa gopid.

### *MAGDALA AH MARIA JESUS ANTOM*

<sup>11</sup> Ipunitak awak danab adit ukaeheh, Maria nug dimitim hibaita, gayaya dayaya, nug gomela neeke, men mod oopa ukom. <sup>12</sup> Neeke uke amu

engel adit, lamen hakab ele, Jesus gada niiom aben amupa laa igipa laa baegpa anam daeheh anatom. <sup>13</sup> Anate, a nug amegpa apid. “Ah na adinu gaatem?” aoya apid. Anam aeh amu nug aum. “Danab ag dahil Nađi aon adehtag gopig, adehtag mepig, da ii dootem,” awa aum. <sup>14</sup> Nug anam anana, nug edua amu Jesus hibaita dayeye antom amge Nug am Jesus amu nug ii doyom. <sup>15</sup> Ah nug edua Jesus ante amu Jesus ah od metom. “Ah, na adinu gaatem? Aun maditem?” od meto aum. Od mete amu ah nug danab amu nug dad amu mamegtai anana amu amegpa aum. “Danab nađi, natai aon gome? Anam dayeb amu na adepa meme amu da amelpa ape, da uken aođul,” awa aum. <sup>16</sup> Anam a amu Jesus edua ah onig diia, “Maria,” awa aum. Anam a amu ah nug edua Hibru naipa, “Rabonai,” awa aum. Amu diig am, “Ipunitak danab.” <sup>17</sup> Nug anam a amu Jesus aum. “Na da aib adailme, da Mame topa ii gomi. Amge na da ođel aona, da lailad gumadna gona, amelagpa inam a! ‘Da, da Mamel, Nug am ag Mamelag ele, da dahil Kayak amu ahilag Kayak ele amu, da Nug gumite gotem,’ ” awa aum. <sup>18</sup> Jesus anam amegpa a amu Maria, Magdala ted, nug uka, ipunitak awak danab amelagpa aum. “Da Nađi anidmi,” awa aum. Anana amu nai Jesus nug amegpa aum amu oh amelagpa aum.

<sup>19</sup> Aria ded amupaib Metidpa gatatu ne, Jesusnu ipunitak awak danab ag Judā dilag okai bađadna, lag od manon daegeg, Jesus uđia tula, ag gumata doa dayaya, ag amelagpa aum. “Ag oo mak madod ele aweg!” awa aum. <sup>20</sup> Nug anam awowa amu



Nug epeg, qeti ele ipuanatom. Ag Nadi anidna amu ag oolag gamag ahak okai doopig. <sup>21</sup> Ag oolag gamag ahe amu Jesus baula amelagpa aum. “Ag oo mak madod ele aweg! Mame Nug da meide udimi, amubia da ele ag maati goteb,” awa aum. <sup>22</sup> Anam awowa, Nug oudi ahilagpa iwala, Nug aum. “Ag Kayak Oudi aweg! <sup>23</sup> Ag danab dilag hipunin opina mataglag amu danab amu dilag hipunin iita mekulag. Ag ii opina mataglag amu danab amu dilag hipunin iita ii memana,” awa aum.

<sup>24</sup> Haen amupa ipunitak awak danab laa Tomas, nuhignu ag Didimas ele ateb amu, nug ag ele ii daaegeg, Jesus Nug udiom <sup>25</sup> amunu ipunitak awak danab laikud laa ag Nadi anidpignu amegpa aeg, nug aum. “Ag Nug epeg tutuipa atulpig amunu dudupa amu da amelpa antena, da dudupa amu epelpa aden, Nug qeti dudupa ele epelpa ade doyena amu da oolpa genab dookul,” awa aum.

<sup>26</sup> Nug anam a dimpa metid laipu uue, ipunitak awak danab ag baula Metidpa laka qag mena daanna, haen amupa Tomas nug ele oh daapig. Ag daanna, lag od oh amu manaton daapig amge Jesus Nug udia oolagpa dayaya aum. “Ag oo mak madod ele aweg!” <sup>27</sup> Anam awowa, Nug Tomas amegpa aum. “Na epen dodopa da epel nakok adan, amenpa ele da epel ante! Na epen bahin, da qetil ele nakok ade! Na oopa genab ii doyak danab bia aib heme. Iita! Na ootpa genab doye!” awa aum. <sup>28</sup> Nug anam a amu Tomas odepa awa aum. “Na dahil Nadi. Na dahil Kayak!” awa aum. <sup>29</sup> Nug anam a amu Jesus amegpa aum. “Na amu

amenpanab da anidna, na ootpa genab doome. Laa ag da ii anidna, oolagpa genab dooteb amu, Kayak Nug ag ititak madate,” awa aum.

<sup>30</sup> Jesus Nug nuhikud ipunitak awak danab noolagpa eponak keeke, danab hekunu elele iita idu idu kudum laa ele heum amu buk imupa oh ii yak. <sup>31</sup> Amge yak imu daate amu ag eb qenana, ag, Jesus Nug am Kristus, Nug am ele Kayak Beka daate, ag amu doona, oolagpa genab dooglagnu daate. Ag nuhignu oolagpa genab doonna amu ag Nug onigpa ag bauklel aoglagnu yak imu amunu ele daate.

## 21

### *IPUNITAK AWAK DANAB EBLAIH LAIPU ELE AG JESUS ANIDPIG*

<sup>1</sup> Ded laa Jesus Nug nuhikud ipunitak awak danab ag Nug baula anidkulagnu Taibirias le ihipa gumata waum. Keeke amuam inam beum. <sup>2</sup> Apa Simon Petrus, Tomas, nuhignu ag Didimas ele ateb amu, aria Nataniel, nug am Galelia wanpanu danab, nug apag diig am Kana amu Sebedi Bekod adit amu Jesusnu ipunitak awak danab adit laa ele, ag oh apa daapig. <sup>3</sup> Anam daanna amu Simon Petrus nug amelagpa aum. “Da kakainu gokul,” awa aum. Nug anam a amu ag apig. “Ig na ele oh gokunig,” aon apig. Anam ana amu ag oh ahan gona, ub laapa tepig amge tuqan amupa ag kakai nakok laa ii aopig.

<sup>4</sup> Butua wakadede amu Jesus uka, le ihipa hibaita dayom amge ipunitak awak danab ag danab amu, Nug am Jesus amu, ag ii doopig. <sup>5</sup> Am Jesus Nug ag od matom. “O nid, ag kakai laa aopigte?” awa aum.

Anam a amu ag, “Iita,” aon apig. <sup>6</sup> Ag anam aeg amu Jesus aum. “Ag uhui ub heqo laih nadiapa eig! Ag anam hena amu ag kakai aoglag,” awa aum. Jesus anam a amu ag uhui nadiapa ena amu ag kakai huanak aopig. Awona, uhui eedpeg bekunu elele iita.

<sup>7</sup> Anam daye amu ipunitak awak danab laa, Jesus nuhignu oo huanak mauhtom ele amu, nug Simon Petrus amegpa aum. “Umu am Nadi,” awa aum. Anam a, Simon Petrus nug udat haaha, ulahnu lamen uda dayom ele amu nug, “Umu am Nadi,” nai amu doya, nug ulah lamen awa ma, oola lepa noum. <sup>8</sup> Nug oola lepa no, ipunitak awak danab laa oh ag ubpa daanna, uhui kakai ele eedpig. Ag umanab ii daapig, yu ihi guguitak, 90 mita keeke daapig. <sup>9</sup> Ag ub el qena uḍin, le ihipa dona amu ab laa ilak ewawa dayeye anidpig. Kakai laala ab otagpa anadna amu bret ele dayeye anidpig. <sup>10</sup> Ag keeke anam anteg amu Jesus amelagpa aum. “Kakai ag geha aaku diipig ele amu, laa akan doig!” awa aum. <sup>11</sup> Jesus anam a amu Simon Petrus nug ubpa ta, uhui kakai ele amu eede, uduaman be, kakai okai okai amu eb qena, 153 anidpig. Am huanaknab amge uhui nakok laa ii pakuom. <sup>12</sup> Anam daye amu Jesus amelagpa aum. “Dona e laig!” awa aum. Ipunitak awak danab laipu laa nug Jesus od meta, “Na aun,” anam laa ii aum. Ag doopig, nug am Nadi. <sup>13</sup> Ag anam doopig amu Jesus Nug doa, bret awa, pania matom. Kakai ele awa, pania matom. <sup>14</sup> Jesus Nug edua hibaitom amu haen ewam aaku nuhikud ipunitak awak danab ag Nug anidkulagnu gumata

waum.

*JESUS PETRUS OO MAUHAKNU OD METOM*

<sup>15</sup> Ag e lana malona, Jesus Nug Petrus od metom. “Simon, Johanes beka, na laa oh edatak dahilnu oot mauhtete?” awa aum. Anam a amu Petrus aum. “Nadi na dootem. Da nahipnu ool mauhte,” awa aum. Petrus anam a amu Jesus aum. “Na dahil sipsip nakud bekadna mede!” awa aum. <sup>16</sup> Jesus anam anana amu Nug baula od metom. “Simon, Johanes beka, na dahilnu oot mauhtete?” awa aum. Anam a amu Petrus aum. “Ao, Nadi na dootem, da nahipnu ool mauhte,” awa aum. Anam a amu Jesus baula aum. “Na dahilad sipsip atog noadna mede!” awa aum. <sup>17</sup> Jesus baula ewam batak Petrus od metom. “Simon, Johanes beka, na dahilnu oot mauhtete?” awa aum. Petrus Jesus haen ewam batak, “Na dahilnu oot mauhtete?” aum amunu oopa guitak doy-aya, nug Jesus amegpa aum. “Nadi na keeke oh doon malame amu na da nahipnu ool mauhte ele dootem,” awa aum. Petrus anam a amu Jesus amegpa aum. “Dahil sipsip bekadna mede!” awa aum. <sup>18</sup> Jesus Nug anam anana, Nug nai baula tudita aum. “Da genabnab genab na amenpa atem, na nid bau daanna amu na naka matagid imuanpa takana, aben na naka gokutnu oot dayom amu na amupa gotame. Amge dimpa na kaino mena amu na epen humape, laa nug na matagid imuanpa tagita, aben na gokutnu oot ii daate, amupa omaiteb gokut,” awa aum. <sup>19</sup> Jesus nai amu matiom amu dimpa Petrus nug ib atemupa mauha, nug Kayak binag amupa meku amunu aum. Nai amu oh

dimpa Jesus Nug, “Petrus na da dim lamide!” awa aum.

<sup>20</sup> Petrus Jesus ele goyaya amu Petrus nug edua neeka, ipunitak awak danab laa, Jesus nuhignu oo huanak mauhtom ele, nug anuka e lanak haenpa Jesus guguita dayaya, “Nadi, aun nug na keked epelagpa meidku?” aum ele amu, nug dim lamatete antom. <sup>21</sup> Petrus nug anta amu

Jesus amegpa aum. “Nadi, danab imu am adi heku?” awa aum. <sup>22</sup> Anam a amu Jesus Nug Petrus amegpa aum. “Da nug anam dayeb, da edue udikulnu amegpa akulnu daalo amu, amuam nahip keekete? Na daib dim lamide,” awa aum.

<sup>23</sup> Jesus anam a amu nug laikud oolagpa ipunitak awak danab amuam ii mauhmanu nai anam nadi meum amge Jesus Nug, “Danab amu nug ii mauhma,” ii aum. Iita! Nug, “Da api, nug ii mauheb, da eduen nekul am nahip keekete?” aakuib aum.

<sup>24</sup> Am ipunitak awak danab amuib nug keeke imu oh amegpa anta, nai amu madite, nai imu ele iiku yom amunu ig dootem, nai imu genab.

<sup>25</sup> Amu keeke kudum laa ele Jesus Nug heum amu, keeke amu oh danab nug bukpa yaalo amu buk huanaknab daalob, buk amu wan imupa am belo.

**KAYAKNU NAI Tituanak Bau**  
**The New Testament in the Nobonob Language of**  
**Papua New Guinea**  
**Nupela Testamen long tokples Nobonob long Niugini**  
copyright © 1990 Wycliffe Bible Translators, Inc.

Language: Nobonob

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-07

---

PDF generated using Haiola and XeLaTeX on 21 Feb 2024 from source files dated 31 Aug 2023

ed374bb9-d819-53d1-a85b-f86cce3892e1